

東

華

續

錄

臣朱壽朋敬編

臣潘鴻鼎恭校

十二月丙寅 上請 籌量嚴行禮○諭軍機大臣等吳棠奏剿除墳壩竄出股匪一摺匪首鞠占能等竄踞鎮雄州屬大寨地方提督李有恆等帶隊躡剿會合滇軍將首要各匪殄除殆盡辦理尙爲妥速其王新大一股據轉經滇軍總兵吳永安督隊會剿設法殲除此股匪徒是否業經撲滅著岑毓英查明詳細具奏並著吳棠岑毓英黎培敬飭令各將領搜捕餘匪務絕根株○廣西按察使英祥以病免以長庶爲廣西按察使○戊辰 上請 奏先嚴行禮畢詣 壽皇殿行禮○道恭親王奕訢請 穆宗毅皇帝几筵前行初周年禮○吏部奏本部存案章程內開各衙門現任人員因勞績保舉以本衙門升階作爲候補查係應升之階毋庸先行開除底缺俟補缺後再行開缺等因在案查現任人員既經勞績保奏以某官作爲候補無論是否應升之階自應令其在所保之填候補不得仍兼原職之缺致滋流弊擬請嗣後各衙門現任人員有因勞績出力保奏及各官照例議叙以某官作爲候補者無論是否應升之階卽令其在所保之填候補將該員底缺以奉 旨之日卽行開缺另行銓補毋庸俟補缺後再行開缺至保

奏以某官升用補用並無作爲候補字樣如係應升之缺不必先開底缺俟補用升用之後再行將原缺開缺另行銓補若非應升之階仍應先開底缺以崇禮制所有同治十一年十二月辦理作爲候補人員如是應升之階俟得缺再行開缺章程應行更正不得援引以免牽混而歸畫一其從前保奏尙未開缺人員應以此次奉旨之日作爲開缺日期如蒙俞允部行文各衙門如有前項所保並未開缺人員卽行查明知照過部以憑開缺均令其所保之項候補○庚午以賊除通濟一帶金匪邊外肅清旌叙參將劉錫全等有差○辛未以奎潤爲左都御史○壬申以京師久未得雪遣恭親王奕訢詣大高殿恭代拈香虔申叩禱○癸酉諭軍興以來各路統兵大臣督撫保舉記名提鎮各員其中才略出眾卓著戰功者固不乏人而人數衆多亦難免有庸劣之員濫竽附入著各路統兵大臣督撫於記名提鎮各員內悉心考察如有實在堪勝專閫之任者再行出具切實考語奏明存記以備簡用若才具平庸不能稱職或著有劣跡者卽著嚴加甄別據實奏參毋得稍涉瞻徇以副朝廷慎選人材至意將此通諭知之○諭御史袁承業奏保舉冒濫請飭核獎等語著該部議奏○諭理藩院奏請將控案就近提審一摺據東扎魯貝勒旗台吉布彥巴雅爾等呈控該旗貝勒自林沁諾依魯布承襲以來竟有協理及屬下人等拆毀府搶去財物復在墳塋燒荒傷斃人命以及苛派差銀各節該台吉家中亦被旗員忠節

等拾去銀兩拆毀房間並有牽涉貝勒夫人與協理台吉蘇克都爾扎布情事如果屬實自應澈底根究  
著瑞聯就近提集人證秉公嚴訊確情按律定擬具奏原告布彥巴雅爾索特木多爾濟並原遞賊呈均  
著該部解往備質○御史袁承業奏聞各省因案提省待質平民往往拖累致死每歲每省均不下百  
餘人且有多至數百人者此等律無明文官司遂漠然視之究之誰非赤子忍令無罪而就死地乎案  
經提省則一案牽連人證不能不與之俱來而室家遠離道途艱苦拮据吏需案竄役凌虐夏則疫癘薰蒸  
冬則飢寒交迫痠弊情形深堪憐憫伏思案內正犯或且事害生還而此牽連待質者則旅殯孤魂長填  
黑獄冤慘極矣臣思其弊蓋有四端一由於臬司審斷不連結一由於州縣解犯不齊全一由於口糧經  
費無正項開銷一由於司事官役無責成考核果能案提到省臬司隨即審結遇有牽連無關緊要之人  
立時省釋一面明定章程凡解省人證遲至一月不齊者作何參處至於經費宜從藩庫撥欸明定數目  
按季支銷仍派員專司其事一有疾病醫藥取保瘠有死亡立即詳報年終核定多寡以定功過庶官司  
不敢漠視而無辜冤民同登衽席矣可否請飭議定章程永遠遵行天下幸甚上諭御史袁承業奏  
各省因案待質人證無辜受累請飭嚴禁弊端等語各省提訊案件理應迅速訊結以免拖累若如該御  
史所奏提省待質人證吏役需索凌虐多至捱斃尙復成何事體嗣後各該督撫等於提省案件務當督

飭臬司迅速審結凡州縣解省人證遲至一月不齊者卽行參奏各該地方官遇有詞訟亦不得以案中無關緊要之人輕率拘傳羈留待質該管上司務當隨時稽察分別勸懲以恤庶獄而重民命○欽奉

慈安端裕康慶皇太后 慈福端佑康頤皇太后懿旨皇帝沖齡踐祚而宜乘時典學日就月將以裕養

正之功而端出治之本著欽天監於明年四月內選擇吉期皇帝在毓慶宮入學讀書著派署侍郎內閣學士翁同龢侍郎夏同善授皇帝讀其各朝夕納誨盡心講以用收啟沃之效皇帝讀書課程及毓慶宮

一切事宜著醇親王妥爲照料至國語清文係我朝根本皇帝應行肄習蒙古語言文字及騎射等事亦應兼肄著派御前大臣隨時教習並著醇親王一體照料○文祥因病請開差得 旨文祥著賞假兩

月毋庸去軍機處差使○丙子欽奉 慈安端裕康慶皇太后 慈福端佑康頤皇太后懿旨署侍郎

翁同龢奏披瀝下忱侍郎夏同善奏鉅任難勝懇辭命各一摺皇帝典學之初端資養正朝廷以翁同龢曾在弘德殿行走有年特命與夏同善在毓慶宮授讀翁同龢夏同善惟當盡心納誨用副簡任之意

其各遵前有毋許固辭○諭巡視南城御史舒應等奏番役私刑拷逼供詐贓請飭部嚴審一摺步軍統領衙門番役曾姓等因竇總之李二袋有破爛大錢輒展轉妄拿私刑拷掠以致民人郭忠全身受

傷並有勒索供詞詐嚇得贓情事實屬目無法紀著刑部嚴行審訊按律懲辦以儆兇頑○丁丑以李瀚

章爲四川總督○諭前據給事中邊寶泉奏浙江餘杭縣民婦葛華氏海斃本夫一案胡瑞瀾擬訊未協請解交刑部辦理當以提案解京事涉紛擾且恐案內人證往返拖累是以未准所請仍實成胡瑞瀾悉心嚴究效據都察院奏林浙江紳士汪樹屏等遣抱聯名呈控懇請解交刑部審訊據呈內所叙各情必須澈底根究方足以成信讞而釋嫌疑所有此案卷宗及要犯要證即著提交刑部秉公審訊務得確情期於無枉無縱至案內各犯著楊昌溶派委委員沿途小心押解毋得稍有疏忽至于管展○左宗棠奏臣上年遵旨裁併留馬步一百四十一營嗣撤穆圖營所部步隊四營半零星貢道仍存馬步一百三十餘營歲需實餉六百餘萬兩加出關糧運經費每年需銀二百數十萬兩通計一年出款共需實銀八百數十萬兩經臣據實陳奏在案各省關原撥添撥協甘餉數原共八百二十餘萬兩歸臣統收分撥實則每年陝西撫臣劉收六十萬兩涼莊營每月額餉五千兩毅軍運費每月萬五千兩穆圖營馬隊每月劉收江南一萬兩通計一年撥去協餉銀九十六萬兩是協甘餉數入款之歸臣經收者實減七百餘萬也臣二次督師入關度隴各省關每年解到協餉約五百萬兩合捐輸入款極力撙節支銷截長補短挪東掩西每年虧挪勇餉百數十萬兩新陳遞欠無可彌補近自籌辦海防東南沿海諸省協解甘餉日漸減少除江西浙江兩省尙肯力顧大局仍舊報解外福建河南兩省協餉全停不解現據西征糧臺呈報

截至本年十月合蘇浙粵三省劃還洋款借項共祇收過各省關協餉寶銀二百六十餘萬兩僅逮常年解款之半其奏提本年年關滿餉六十萬兩僅浙江七萬已准照解四川報解五萬兩山西報解三萬兩此外尙無起解消息入款之減如此現遊 旨整軍出關軍需應用火器子藥皮棉衣褲靴包棚帳駝騾馬匹採買製造轉運諸費一歛動需數十數萬不等出款之增一也汰遣弁丁應消欠餉添募精壯應增正餉出塞征夫除食糧應照章核扣正餉外餘餉均需現銀發支出款之增二也哈密巴里坤諸處餉項部員責其核奏漸且改爲挪墊出款之增三也南北各路糧運九月以後愈加暢旺用車駝騾馬人分牲畜各數萬計腳費薪糧概須現發口袋氈條車馱配帶什物需隨時添置預備所費倍加於前出款之增四也師出南路安西西迄百城關之三箇泉子沿途戈壁相間人烟斷絕薪桂米珠軍糧需數百里轉饋柴草須數百里割刈非預先發價飭各該印官局委設法購備不能過師巴百兵民屯墾之委員設局耨耕牛籽種農具採購製造動需鉅費出款之增五也俄人允爲承辦軍糧勞費雖省而腳價均須現銀發給至遲不能逾三箇月之限道遠運艱宜預籌籌解出款之增六也關以內馬步百餘營鹽糧餉乾薪炭公費地方津貼諸款每月仍非數十萬兩不能點綴出款如此上年奏借洋款原擬湊集現餉遊 旨大加裁撤減一分積欠卽省一分出款乃洋款到甘遲緩除扣還前解商款外餘銀一百七十餘萬兩

先後到甘祇敷支發隨到隨罄欠發勇夫正餉八百餘萬兩上年已清盤二百餘萬者今又漸增新欠陳  
陳相因莫知所底現因年節屆時應口滿餉一月各營將弁兵勇盼望甚殷出關馬步各營已調赴涼州  
合隊待餉進發各路糧運腳價待銀應付驟增紛來急如星火臣無以應也不得已飭辦理臣軍駐鄂後  
路糧道員王加敏駐陝軍需局道員沈應奎籌借商款六十萬兩提前解甘由臣分別點綴權濟目前  
欠餉之日益加增又如此臣前奏中需文結請速籌解濟嗣接准部覆請 旨飭下各直省督撫將軍即  
行查明上年由部提撥各款欠解若干勒限一箇月解清福建欠解銀三百餘萬兩應飭遵 旨趕緊如  
數籌解其餘各省欠解西征月餉統限一年內先行提解一半其餘一半欠餉仍隨每月應解協餉陸續  
分解從本年爲始各省關應解協餉月清月款不准絲毫帶欠俾該督得以迅赴戎機免致貽誤奉 旨  
依議欽此嗣經陝西撫臣譚鍾麟奏提元年年關滿餉部臣援照成案請由浙江等十一省共提銀十萬  
兩奉 旨統限十一月解清各等因欽遵咨行並飭糧款分別委員遵限守催車馬舟船相望於道百做  
層焦迄少應者 朝廷軫念出塞征軍所有應解西征協餉嚴切限催 諭旨煌煌各省疆臣非敢視爲  
具文也隴餉奇絀停兵待發共見共聞婉懇諄催而延緩如故者非必悉存膜視也餉源祇有此數此盈  
則彼絀顧此則遺彼理所必至勢有固然查部撥西征軍餉一歲應解之數雖有七百餘萬兩其實在可



錄專款向以東南七省釐金爲大宗上年部臣籌撥海防各餉內由蘇浙等六省每年劃分釐金二百萬兩雖曾聲明在於應協西征軍餉之外添撥各省關自應各解各餉一體兼顧毋稍偏重固已預慮各省關之先洋防而後塞防然究之沿海腴區與隴中荒瘠既非可相提並論整軍待發之餉與先事預防之餉亦非可併處之一時者疆臣畛域之見難忘望其損己益公固無其事卽責其先人後己亦勢有難能就目前實解協甘之餉計之幾比常年短至一半積欠協餉非獨未能遵旨先提一半依限解現截至十月且增至二千七百四十餘萬是東南釐金大宗既被洋防占去其波及塞防者固不能多也論旨飭令先其所急原統洋防塞防言之令疆臣極其緩急以爲先後也部臣劃洋防塞防爲兩款疆臣之專協洋防勢難兼顧塞防亦必至之勢前此李鴻章議停撤西師減塞防之餉以裕洋防意本如此特無如事有所不可耳現在西師既不可撤且更增出塞之師籌塞外之糧運屯墾經費日增於前而各省關應協西餉且愈減於前全隴瘠苦情形甲於天下就地既無可籌專盼各省釐金協濟而各省釐金大宗又均爲洋防占盡部限雖嚴轉瞬卽屆年關各省應解各款迄未報解臣萬不禮已飭臺局籌借六十萬兩暫顧目前原約明年二三四月歸款屆期各省協款卽令旺解必陸續清還解款而臣軍已寅支卯糧協款一到卽盡仍歸無濟若不提還借款卽先失信商人此後並籌借之一縷生機而亦塞矣寤夜思維

固知所措竊維上年籌辦臺灣防經費兩江督臣沈葆楨議借洋款一千萬兩按每年八釐行息分作十年籌還業與洋商定約具有成議嗣臺防事定減借二百萬兩仍分十年撥還在案應懇 天恩俯念隴餉涸竭事機急迫俯准援照臺防成案 允借洋款一千萬兩仍歸各省關應協西征軍餉分十年劃扣撥還於 國計絲毫無損於各省應解餉藉資騰挪微臣得所藉手迅赴戎機於目前局勢實有裨益得旨該衙門速議具奏○左宗棠奏泰西各國遇有兵事向商人借用巨款相習為常洋商之來華貿易者每以此為利從前尙有以應請借用洋款與否向問者可知用兵借銀本各國常例商情轉便無華商居奇之心且借款愈多則恩銀愈減亦與華商計畫迥異沈葆楨籌辦臺灣防時關初議借用洋款一千萬兩每歲給息銀八釐洋商樂從並無推諉其時即有為籌策者謂隴局艱難至此亦仿照辦理免致坐失事機臣以關內業已肅清宜力圖撙節故祇擬商借三百萬兩嗣奉 命督辦新疆軍務籌辦關外採運出款日增而擬借洋款又因部議遊移洋商見胡光墉取銀遲緩疑未釋前又因粵東故生枝節需押蓋印均多推諉商情不能釋然雖勉踐前言而發銀遲緩致臣感道撤諸事未能應手徒耗月息而應協各省見已借洋款三百萬兩遂謂隴餉或可稍資周轉漠不關懷不知臣因洋款遲到先飭各臺局應借華商各款外祇一百七十餘萬到營耳頻年艱苦竭蹶之狀莫此為甚臣不督經理人乎何尤現在

出關各營均已齊集涼州日加訓練擬於明正拔隊先行臣之親軍亦已整理完備俟辦軍務劉典到關將留防營後諸務面商一切不過旬日亦即啟行惟默計前途車火子藥糧食柴草雖略有儲時而行餉不能攜帶一月倘後路無餉接濟不堪設想又出塞之行成敗利鈍非能逆觀縱令事機順利而合新疆二萬里地方規畫久遠較之洋防七千餘里局勢尤寬歲月久暫遲速非可逆計徒擊空拳空談遠略非特無其理亦無其事暫擬借洋商巨款實迫於萬不得已之苦衷伏懇 聖慈特飭沈葆楨仿照臺防辦法代 臣籌借俾 臣得藉手稍圖尺寸之效西事之幸 臣之幸也至其息銀多寡及一切辦法請由沈葆楨酌定 臣不與聞緣沈葆楨素為各國所信服商借洋款曾有成議此時重尋舊說可免洋商疑慮又辦理南洋事務就近與各省關商議可無窒礙較 臣所慮尙易為功得 旨該衙門速議具奏○

戊寅欽奉 慈禧端裕康慶皇太后 慈禧端祐康頤皇太后懿旨欽天監奏選擇入學吉期一摺著於明年四月二十一日皇帝入學讀書○諭崇實等奏訊明不安本分之宗室請旨發遣一摺宗室德精額行使假錢帖訛詐商民宗室惠齡前於同治十二年間因案連伊魯口發往盛京職因賭生事強搶劉德春家衣物均屬不安本分膽大妄為惠齡並伊魯口及德精額著一併發往黑龍江交該將軍嚴加管束以示懲儆○庚辰諭所有翁同龢承修 惠陵工程著改派吏部左侍郎恩承敬謹辦理○以假壽慈賢

禮部尙書○以載容署鎮藍旗漢軍都統○諭前因吉林三姓屬界金匪滋擾經穆圖善等查明該處卡官有受賄縱匪情事當將該卡官雙福等革職諭令穆圖善等嚴訊究辦茲據訊明按律定擬並片奏該犯等執法營私請從重嚴辦明正典刑等語吉林地方積習太深守卡各官輒敢收受陋規縱匪偷挖金沙以致貽害地方殊堪痛恨卽立擬重典亦罪無可辭姑念陋習相沿已久暫從寬典所有革員雙福勝額圖榮陸益斐音努等著照所擬發往軍臺効力贖罪並著穆圖善等隨時整頓倫嗣後卡官復敢仍前玩法卽著奏請立正典刑有犯必懲決不寬貸○諭崇實等奏籌辦邊務請飭調員差委等語熱河候補知縣朱灝李應培直隸北河候補通判馮士懋直隸候補知縣高乃驥張錫蕃寶墳卽用知縣米協麟湖北候補知州李輔候補知縣張錫鑾丁燮回河南原籍湖北鄂縣知縣張樹蕃直隸總督熱河都統湖北河南各巡撫分飭各該員等剋日起程馳赴奉天交崇實等差委○辛巳祈雪舉行三壇禮典仍遣恭親王奏祈詣 大高殿恭代叩禱○諭前據左宗棠奏已革甘肅肅州鎮總兵黃金山惡迹昭著請旨立正典刑當交刑部速議具奏茲據奏稱黃金山被控謀叛助逆等情雖無確據惟收留義子黃萬發致令謀叛滋事並擄殺無辜營員姦佔民間婦女被控後匿不赴審輒私回原籍聚眾置械藉口赴營投効實屬惡迹昭著等語黃金山以專閫大員不能奉公守法竟敢肆行無忌心懷叵測罪無可追著左宗棠卽將

諫革員軍前正法以肅戎行已保參將楊子英因黃金山殺其堂弟楊得成始行首告非激於義忍可比  
著遞回原籍交地方官嚴加管束不准投効軍營○壬午諭錫祉等奏請飭嚴催欠交米石一摺直隸承  
德府屬應交熱河兵米據稱各該州縣欠交同治十三年秋冬二季米八千六百九十餘石現存倉米不  
敷支放等語卽著李鴻章嚴催該府州縣趕緊買運交倉以裕兵食○諭御史張道淵奏殿試交卷遲延  
請行嚴禁一摺殿試大典理宜慎重若如該御史所奏近科士子竟有於中左門前未燭書寫延至夜半  
始行交卷之事實屬不成事體嗣後殿試著監試王大臣等留心稽查總以日暮爲度其不能完卷者不  
准攜至中左門補寫所有銜押標記視卷內冊至何處卽於何處標畫以杜弊端若時刻尙早該王大臣  
等亦不得違行撤卷用副朝廷慎選人材至意○癸未諭軍機大臣等李瀚章奏匪徒設立會名全在大  
吏督飭地方官設法嚴拏毋稍另立章程著沈葆楨體察情形悉心妥議○諭御史張道淵奏請飭各省  
辦理開墾事宜等語據稱各省軍務肅清荒田所在多有其招墾者每因書差需索以致戶民不敢承領  
其已墾之處並有書役及刁生劣監通同作弊捏報短征勒索私派甚至有開墾多年不令升科等情而  
宜認真整頓著各省督撫飭令各府州縣查明未經開墾之地成爲招徠酌給籽種其已經開墾者無  
論何地實力稽查如有尙未報明者酌量田地准其照例升科倘有書差勒索包庇及藉端滋擾等弊卽

著嚴行懲辦○諭御史張道淵奏各省命盜重案請飭各該道細心覆審等語道員職任監司審理案件原屬分內之事著各該督撫嚴飭各該道於所屬命盜重案細心覆審不得僅以過堂了事致有枉縱○御史張道淵奏國家歲入有常用欸無定非量入爲出遇事必多掣肘查自東南軍興十有數載入欸日少出欸倍多庫儲空虛實由於此現雖各省蠲清元氣未復荒田多而錢糧未全徵洋局設而稅釐皆不旺捐輸日形減色鹽引時度停銷以入之少供出之多計數已屬不敷加以關外餉捐按時撥濟江海防務費用多端雖由各省分籌無非取諸所入之項臣每聞各省奏報情形本各不同然於應撥之欸總謂庫存無多難於籌解又或短欠之項本省實無可籌不得已另請指撥他省其不能兼顧已可概見幸多方挹注尙可支持惟剝肉醫瘡究非長計現如山東巡撫丁寶楨以議修運河預請籌欸四川總督吳棠以銅源不繼展辦備指可見舉一事即增一欸得一欸乃資一用爲數既鉅籌備宜先節儉以爲理財之道不外出入兩端欲敷所出必先裕所入而欲裕所入必兼節所出擬請 飭下各省督撫毋率同所屬各衙門於每年徵收正項存留雜欸及一切應繳應賠公捐生息銀兩認真清查數目凡有虧空侵吞短交欠解等弊嚴行追收入庫其應出者除照例發給外如添增口糧製造工費及一切坐支外解動用項下逐件核算但有浮冒開銷與徒糜無益之處卽酌量裁減入公總期入不虛出入不濫出多得一入

款即多供一出款多省一出款即多存一入款如此則事歸核實用不虛糜撥節之中於時事亦或有裨

上諭御史張道淵奏請飭各省稽核款項以備差需一摺現在時事多艱度支未裕各省協濟餉精及一切用款需費浩繁全賴各大吏認真清查隨時稽核庶幾庫款充裕足備供支著各該督撫府尹督率所屬於每年征收正雜款項核實稽查遇有虧短侵吞短交欠解等弊即行嚴飭追繳並於動支各款力杜冒銷一切無益之費概行裁撤以期用無虛糜○乙酉召廣西學政吳華年回京供職○諭前據沈葆楨等先後具奏臺北擬建府屬縣治請移紮南北路同知酌改臺地營制臺屬考試請歸巡撫主政各摺片當派軍機大臣等會同該部妥議具奏茲據奏稱沈葆楨等所奏各節係為因時制宜起見自應准如所請著照軍機大臣等所議准其於福建臺北擬建地方添設知府一缺名為臺北府仍隸於臺灣兵備道附府添設知縣一缺名為淡水縣其竹塹地方原設淡水廳同知即行裁汰改設新竹縣知縣一缺並於噶瑪蘭廳舊治添設宜蘭縣知縣一缺即改噶瑪蘭廳通判為臺北府分防通判移紮雞籠地方福建巡撫現在既有駐紮之日其臺地營制並著照所議該處千總以下山巡撫考拔守備以上仍會同總督揀選題補臺灣鎮總兵撤去掛印字樣歸巡撫節制即將安平協副將裁撤至所請移紮南北路同知並歸巡撫考試等語臺灣南路同知即著移紮卑南北路同知改為中路移紮水沙連各加撫民字樣臺灣

學政事宜並著歸巡撫兼理○內戊諭前因瑪法塔坐卡官雲騎尉德陞因故放車馱勒索錢文一案私自脫逃經穆圖善等奏當降旨先行革職茲續據穆圖善等奏稱該犯官潛赴盛京將軍衙門呈控押解歸案行至葉赫站地方復行潛逃請飭查拿等語著步軍統領衙門順天府五城將德陞一體嚴拿務獲歸案究辦○李瀚章辭煥奏前因訊取戕害馬嘉理犯供旋經添派道員丁士彬知府蔣錫勳會同臬二司公同研訊各犯仍只供認拍劫因洋人施放手鎗斃其夥匪阿用一名登時起意拒捕殺害馬嘉理及其跟隨四人而於何人主使堅不吐實吳啟花供稱實無知情與謀之事李珍國於威妥瑪照會所指各節一味委卻再三究始始據供稱去年十二月騰越眾紳因洋人帶領多兵前來恐其滋事彈劾各保身家會與通信等語情節已屬可疑適值李瀚章途中所派永靖鎮總兵李勝前往騰越一帶密查回省稟稱飭查馬嘉理之被戕由於匪犯行劫拒捕而暗嚇野匪阻截洋人勿令入境道路傳聞均係李珍國所為惟馬嘉理被害時李珍國並未在場亦無兵勇在內等語卷查本年三月撫臣岑毓英據李珍國稟呈騰越紳眾兩次公函該都司稟內實有嚴密防範固守本境字樣雖經撫臣岑毓英函諭嚴阻百姓毋許張皇已在案出以後業經無及是李珍國雖無謀殺之心亦有計阻之跡臣等公同商酌未便因其畏罪飾延特符狡展相應請 旨將副將銜儘先參將鄧署南甸都司李珍國先行革職提回已革回



知吳啟亮並催提已革總兵蔣宗漢尅日來省分別研鞫以成信獻 上諭李瀚章奏請將鄧署都司革職歸案審究一摺前署雲南甸都司李珍國於馬嘉理被戕一案據供騰越眾紳開洋人帶領多兵前來齊團各保身家曾與通信等語是否另有情節亟須澈底根究李珍國著先行革職交李瀚章等提回已革總兵蔣宗漢已革同知吳啟亮分別研鞫以成信獻○丁亥以世鐸著領黃旗滿洲都統○曾國荃奏前准部咨欽奉 上諭丁寶楨奏現辦堤壩兩工情形請設立總汛一摺著該部會同河東河道總督妥議具奏欽此部臣以黃河水勢何處險要總汛應設何處未便懸擬合 詳細履勘體察情形專摺覆奏再行核辦奉文之際時值大汛正在黃河上游將飭修防奏明暫緩赴東嗣於霜清後赴濟寧閱伍查勘運道即親履堤工委員逐段丈量自關陽汛十堡起至連口十里堡止計程三百餘里內惟海澤縣新工下堤工共一百九十餘里頂寬三丈底寬十丈高一丈四尺係實工合龍後丁寶楨率辦成者較時將齊堤防守惟切近大河迎溜坐灘之處尙宜酌量加寬其餘民埝或高寬數尺至丈餘不等且土性沙鬆已難攔禦汎水而關陽口門以下至長垣縣境七十里則尙無堤岸如設官防守須先將該處興築堤工並將民埝卑窄段落一律幫增高厚再行設官方免下防上溢之虞查上游黃河大堤頂寬六七丈至十餘丈不等今縱不如上游堤工之寬厚而臨黃緊要工段亦必須量爲加寬始能堆料鑿掃盡力

防守以捍不虞第以實土核計銀數均非二三十萬金不辦值此經費支絀焉能籌此鉅款若欲借資民  
力則下民昏墊已久詎能踴躍從公然察看無堤之處溜勢若一側注不獨山東境曹單金魚鉅嘉等縣  
漫淹入湖淤塞運道而江境淮揚通海財賦之區亦大可慮臣再四思維擬於無款可籌之時作一變通  
辦理之計河南閩侯境內應築堤二十里直隸長垣境內應築堤五十里及該上下首並東明境內卑窄  
堤工應行幫培者亦復不少擬請山直隸督臣河南撫臣於各本省派撥將弁酌帶練軍練勇前往興築  
兼山河工派撥明白工程弁兵幫同力作務令層土層砥豎實夯打一律鞏固其東省單薄堤埝仍由山  
東撫臣派令現在駐堤勇丁擇要增培凡於溜勢趨注喫重段落量爲加寬然後分設糧營汛弁兵夫按  
段駐守庶幾聯爲一氣免致溜再旁趨至於北岸地勢本高且有舊日金堤屹峙於二十里之後實足借  
資衝護北岸土地人民目下先其所急理宜防守南堤爲保全山東運道及江北財賦之區一俟各工辦  
理完竣便可設官照舊修守惟念 國家制用有常設官則經費難籌如將從前裁撤乾河廳營各缺及  
已裁卡夫酌量移復以免另行添設爲力較易而爲費亦可較省查銅瓦廂失事下游河洞工停南北兩  
岸裁撤同知二缺通判五缺州同一缺州判一缺縣丞四缺主簿六缺巡檢二缺經歷一缺都司一缺協  
備六缺千總三缺把總二缺分防十一缺共裁文武四十五缺裁汰額兵一千零九十名又裁僕夫七百

二十四名現擬先就南岸新堤劃分段落設同知三員通判一員州判一員縣丞三員主簿四員巡檢二員都司一員守備兩員協備一員千總三員把總二員分防五員以上各缺均於已裁各缺內酌量復設惟此裁缺內並無守備應於協備缺內改爲守備二缺共計移設二十八缺額外委十一名向於記名外委內拔補並撥兵六百一十四名堡夫四百九十五名將堤岸劃分段落酌定廳汛名目其直隸河岸堤段較少應分隸於河南之開垣廳與山東之荷明廳就近兼管以免隔河呼應不便以上四廳惟開垣廳應隸於開歸陳許道管轄其荷明廳漢陽廳壽州廳均應隸於兗沂曹濟道管轄第堤岸既立則每歲修守之資卽應預爲籌備查從前河南開垣山東清河糧河曹考等廳另拾各案雖無一定之數而每歲修守約共需銀二十餘萬兩開垣由河南籌撥漕糧等廳用款歷由山東籌撥今自新堤創始修守應於籌章無殊每年實需銀兩若干原難預爲懸擬必須試辦二三年方知大概規模以後每歲需購歲料若干歲麻若干磚石若干防險銀若干似應察看各廳情形就工之繁簡埽壩之多寡以定銀兩之數目三年之內由各道廳稟明河臣履勘險要秉公酌中定議方可以垂永久之科則至於此項工需應請 聖訓飭部頒行議定指明由山東河南照應撥款以便內子年設廳之後遵照辦理下部議奏○恭親王奕訢等奏准軍機處交出光緒元年七月二十四日奉 上諭崇實奏遵 旨變通奉天吏治章程

一摺著軍機大臣六部九卿會議具奏欽此欽遵交出到部又內閣交出光緒元年九月二十九日奉  
上諭崇實等奏奉天州縣各官仍請變通辦理一摺著軍機大臣六部九卿歸入崇實前奏變通吏治章  
程摺內一併會議具奏欽此欽遵抄出到部查原奏內稱將軍事權宜變通等因此維持通省之苦衷實  
挈領提綱之先務也兵部查添設副都統一節前經議擬添設 興京副都統摺內擬請 承陵翼長關  
防等官並守護 陵寢各項兵役統歸新設副都統管轄官兵升調緊要事件仍歸將軍核辦等因於  
光緒元年四月二十三日具奏奉 旨依議欽此欽遵行知在案今新設 興京副都統遇有官兵升調  
暨緊要事件應即遵照前奏辦理吏部查例職各省總督授為都察院右都御史應否兼兵部尚書銜吏  
部具奏請 旨等語查 盛京將軍既經改為管理兵刑兩部兼管奉天府尹事務其所請仿照總督  
體例加銜之處自應准如所請擬請嗣後遇有 盛京將軍缺出欽奉 諭旨簡放後應由兵部知照到  
部其應否加兵部尚書銜之處 吏部比照總督兼銜之例奏明請 旨辦理督辦軍務於兵刑糧餉皆當  
並籌並關防加兼理糧餉字樣以便管帶金銀庫印鑰戶部查 盛京金銀庫奏銷向由 盛京將軍會  
同戶部按年具題是戶部出入錢糧該將軍本有稽核之責現在該省督辦軍務糧餉又關緊要既經仿  
照各省總督體例加兵部尚書銜所請另頒總督奉天旗民地方事務關防一顆並加兼理糧餉字樣以

便管帶金銀庫印鑰之處應請准如所奏辦理以專責成兵部查嗣後 盛京將軍缺出欽奉 諭旨簡

放後卽於 臣部知照以便辦理刑部查 盛京將軍既經改爲兵刑兩部兼管奉天府府尹事務所有刑

部及奉天府旗民一切案件悉歸總理俾資整飭另頒總督奉天旗民地方軍務關防一顆並加管理糧

餉字樣吏部查定例文職官員印信由吏部議准撰議字樣送部鑄造等語今 盛京將軍一缺改爲管

理兵刑兩部兼管奉天府府尹事務卽仿各省總督體例加兵部尚書銜另頒總督奉天旗民地方事務

管理糧餉關防一顆恭候 命下由吏部撰擬字樣送部鑄造頒發又查原摺內稱府尹事務宜變通等

因吏部查該署兼管府尹等奏稱近年民多於旗輟輟最甚府尹雖設有臬局審斷每不得自專其中命

盜重案動輒久稽擬請將來天府府尹一缺加二品銜以右副都御史行巡撫事旗民各務悉歸辦理等

語該署兼管府尹所奏係爲今昔情形不同慎重地方起見自應准如所請奉天府府尹一缺准其加二

品銜以右副都御史行巡撫事以資彈壓遇有旗民詞訟命盜案件悉歸該府尹辦理以專責成而歸註

一又查原奏內稱五部事務宜變通等因刑部查該署兼管府尹等奏請將奉天府府尹一缺加二品銜

以右副都御史行巡撫事旗民詞訟命盜案件悉歸專理至刑部亦如京中刑部體制嗣後惟旗民交涉

罪在犯徒以上方准該部按律定擬其餘一概不得干預該司官等如再有違例收呈提案及相驗逾限

等事徑山將軍指明嚴參等語查奉天旗民交涉案件罪在徒罪以上方准刑部按律定擬其徒罪以下及旗民一切詞訟應歸府尹專管仍各由將軍總理既爲兩無牽制各專責成嚴杜弊端免致轉輾起見應如所奏辦理吏部查旗民交涉案件既據該將軍奏稱罪在犯徒以上者方准該部按律定擬其餘一概不得干預如同官等再有違例收呈提案及相驗逾限等事經該將軍嚴參到日卽行照例議處兵部查 盛京二十九驛向係責成各驛丞率同驛丁經理並准 盛京兵部督飭驛站正副監督隨時查察

立法本極周密乃近來驛務廢弛文報往往私拆甚至機密釘封亦多拆損尋常公府任意積壓實屬不成事體今該署將軍擬請將地方同通州縣各員兼理驛務會同驛站監督隨時密核誠爲慎重公務起見臣等查例載部院衙門及將軍督撫提鎮等驛遞緊要公文如有擦損遲誤該驛遞夫役鋪司及該管官俱照例分別議罪至軍營臺站往來報匣及夾板及兵部加封事件事關軍務如敢擅拆洩漏事情者無論官兵馬夫均按軍法從事專管之文武員弁革職拿問該管大員照例議處其往來文移關係軍需及升調參革等事如有私拆情弊卽將私拆之人治罪專管員弁及管理大員分別議處如下站接遞上站公文見有拆動不行呈報者照例議處又臣部於同治元年十二月遵 旨妥議防範私拆釘封內開嗣後釘封公文用高麗紙捻連釘兩頭黏貼印花下站接到時如無拆動形跡卽出具印收受上站弁

兵馬夫帶回如有拆動卽將上站弁兵馬夫扣留回明本站該管官取具親供一面將公文加封馳遞一面將親供呈報該督撫大臣專摺奏辦行令遵照在案今該署將軍既擬令同通州縣兼理驛務其應如何會同驛站監督察核驛丁及各驛驛丞應如何與同通州縣互相關會之處應卽由該署將軍妥議飭遵並咨照臣部立案倘嗣後再有前項情弊卽行查照臣部例案由該將軍查明除驛丁照例治罪外卽將專管驛站之監督驛丞暨兼理驛務之同通州縣分別參處又原奏內稱奉天府治中一缺宜變通等因吏部查該署兼管府尹所奏奉省大吏太多下僚太少兼尹府尹以次少一承上啟下之員通省清查虧空督辦案情須有專司方資表率擬於奉省中添設首道一缺名爲驛巡道閩省驛站及新設捕盜營之同通州縣悉隸其下惟增修衙署招募丁役繁費殊多猝無所出擬卽將治中一缺加一道銜兼行首道事務餘仍其舊查治中本係漢缺向歸捐選嗣後應將正途出身人員改爲請旨簡放係爲吏治未備酌量變通起見自應准如所請惟治中一項僅止二缺順天府治中一缺例應歸部銓選向無此項記名人員適遇缺出無可簡放且治中兼行首道事務職任互殊亦與體制未合臣等公同酌議擬請將奉天府治中一缺裁撤改爲奉天驛巡道卽作爲請旨之缺遇有缺出於正途出身記名道員內照例請旨簡放所有閩省驛站及新設捕盜營之同通州縣悉隸其下其衙署一切繁費殊多應令俱仍其

舊乃於變通吏治之中仍與政體無礙至奉天府治中一缺既經裁撤改爲奉天驛巡道而現在治中高同營一員自應將該員以對品升轉相同之府同知改選其奉天驛巡道一缺應作爲衝繁疲難四項請旨之缺應俟該署兼管府尹等查明具奏到日卽行請旨簡放至另頒奉天驛巡道關防禮部查定例文武官員印信由吏部議准撰擬字樣送部鑄造等語今奉天府治中一缺卽經吏部議請裁撤改爲奉天驛巡道自應頒給奉天驛巡道關防一顆恭候命下由吏部撰擬字樣送部鑄造頒發其奉天府治中關防一顆應照例送部繳銷其廉俸須隨後另籌一節戶部查奉天治中一缺每年額設俸銀八十兩養廉三百五十兩按照折減章程核放現既改爲奉天驛巡道其俸廉應否酌量加增統俟該署將軍查明具奏到日再行核辦又查原奏內稱旗民地方各官宜變通等因吏部查該署兼管府尹所奏旗民地方各官前次請照熱河定例將地方通同以下全加理事等銜片奏在案之處業經臣部查熱河地方緣因今昔情形不同是以議准將州縣各缺不論滿漢一律請補奉天州縣各缺承德縣錦縣附府首邑係無論滿漢准其揀選其附近蒙古地界之義州開原鐵嶺廣寧等州縣應專以滿員請補其非與蒙古地界相近之遼陽寧遠復州蓋平寧海海城等州縣應專以漢員請補定章判然各別遵行日久並無今昔情形不同之處非現在熱河地方可比已將該署兼管府尹所請將奉天各屬州縣仿照熱河之例不



拘滿漢一例請補均加理事同知通判銜之題另摺奏駁於光緒元年八月初六日奉 旨依議欽此行  
文知照在案茲復據該署兼管府尹等奏稱奉省州縣各官滿漢俱有專缺每遇人地未宜礙難更調又  
因滿漢分管旗民諸多掣肘是以奏請滿漢兼用並請加理事同知通判銜等因 等伏查奉天州縣各  
缺專用滿員或專用漢員例有專條並行已久原未便率為更章惟既據該署兼管府尹等瀝陳該處地  
方現在情形今非昔比勢不能不略為變通冀可轉移積習不至牽掣如前且奉省現值整飭吏治之時  
正當相地擇人未便拘於成格致滋遷就遺誤擬請准如所請將奉天各州縣等官仿照熱河之例滿  
漢兼用州縣各官均加理事同知通判銜至道府同通州縣山吏部推廣升途 等查定例內載奉天昌  
圖廳通判照磨一缺定為三年俸滿如果著有成效令該府尹等詳加察看出具切實考語咨部以應升  
之缺歸入即升班內令其在任候升等語又奏定章程內開奉天治中同知兩項均定為五年俸滿果能  
緝盜安民著有成效令該兼管府尹等出具切實考語保題到部准入於即升班內升用如俸滿保薦後  
有願捐升階候選及指省候補均照籌餉例內即升人員報捐之例辦理等因在案今該署兼管府尹所  
奏係為鼓勵人材整飭吏治起見自應准如所請除道員一項升途較繁並無選補之缺未便由部擬議  
外其餘知府同通州縣等官自應比照奉天治中同知等官之例量加推廣均定為三年俸滿如果著有

成效令該兼管府尹等詳加察看出具切實考語具題到部入於卽升班內升用仍在任候升如俸滿保薦後有願捐升階候選及指省候補者均照例例內卽升人員報捐之例辦理旗界大小各口只准經理旗租緝捕盜賊此外不得絲毫干預戶部查該省旗民應徵銀米草豆向由盛京戶部按年造具旗界各官經徵督徵考成清冊送部由戶部會同兵部核議現據該將軍奏請旗界大小官員只准經理旗租此外不得絲毫干預係屬申明舊例辦理應令該將軍嚴飭旗界各員嗣後實力徵收如有未完卽查照定例題參以重考成兵部查盛京所屬內外各城旗員承催地畝考成向係盛京戶部每年將承催督催各官已未完分數造冊咨送戶部由戶部會同兵部計分數題請議叙該處歷經辦理在案至緝捕盜賊一節查武職各官緝捕是其專責干預公事例有處分今該署將軍據請旗界大小官員只准經理旗租緝捕盜賊此外不得絲毫干預等語應准如所奏辦理嗣後盛京戶部按年將旗員承催地畝考成已未完分數造冊咨送戶部會同兵部核議並各城遇有抽盜不力及干預公事之員應由該將軍照例參辦緝捕處分自城守尉至圖記佐領必與州縣一律輕重本城旗人尤須再申定例不許作本界武職各處城守尉請旨簡放時擬擇宗室中諳練政事之員方能稱職如其才力不勝應由將軍隨時甄別方能不致貽誤地方兵部查定例興京復州岫巖鳳凰城開原遼陽南金州城守尉缺

出由值年旗於頭等侍衛八旗前鋒參領護軍參領宗室人員內揀選二三員帶領引見補放等語嗣後盛京所屬各處城守尉仍由值年旗查照定例於宗室中揀選諳練政事之員帶領引見補放又查從前盛京將軍衙門造送所屬內外各城額設武職官員各缺分晰旗翼揀選補放清冊內開盛京本城及所屬各城協領佐領防禦騎校等官缺出於內外城本旗本翼人員內揀放者較多今既奏稱本城旗人不許作本界武職應如何隔城揀選之處仍由盛京將軍另行酌擬章程咨部以便核辦又查原奏內稱各大吏養廉宜變通等因戶部查盛京將軍每年額支養廉二千兩停止一成其一成實銀按八折支給八成實票每兩按市平銀二錢五分支給奉天府府尹每年額支養廉一千兩府丞養廉四百兩停止二成其四成實銀按八折支給四成實票每兩按市平銀二錢五分支給五部侍郎養廉每年領三百兩分春秋二季支領每季應領銀一百零八兩按八折實銀支給應領票銀四十二兩每兩按二錢五分支給其將軍侍郎養廉向由金銀庫開支府尹府丞養廉向由該省耗羨項下勦支歷經辦理在案現據該署將軍瀝陳該省陋規變本加厲欲求整頓非加養廉不可應請將將軍養廉每年給實銀八千兩府尹養廉每年給實銀六千兩府丞養廉每年給實銀二千兩係為力除積弊整飭地方起見應請准如所奏將該省將軍府尹府丞養廉統俟明年為始按照此次奏定數目均以實銀支給至此項

養廉可否卽由海關道徵收盈餘及新增盈餘兩項下按年支解作正開銷之處查此項養廉銀兩應准其在於山海關所徵新增盈餘項下動支卽從光緒二年爲始按年由該關道撥解仍分晰造冊報部並請飭下該將軍將應裁陋規一切裁撤嗣後倘再有貪墨之吏仍蹈積習立卽據實嚴參以肅吏治毋得徇縱再此次加給養廉銀兩並准其由關稅新增項下支給係爲根本重地培養宜先現當整飭之時是以稍加優異至他省情形詭容並論卽附近之吉林黑龍江亦與秦省稍有區別均應仍按向章辦理不得援以爲例率請加成以示限制其副都統五部侍郎養廉原額本少所請均以八成實放不必迭爲折扣亦應准如所請自明年爲始一律均按八成實放給以示體恤此項廉銀仍由金銀庫按季關領分年造報核銷以昭慎重又查原奏內稱倉差規費變通等因戶部查本年七月該署將軍以旗租草豆一項弊竇叢生利歸中飽奏請無論上中下戶但有一口六畝之糧止徵粟錢一千一百二十文此外不得復立名目奏奉諭旨知道了欽此當經戶部行知遵照在案茲據奏稱此項草豆折色正供之外尚有盈餘謂之倉差規費每年約在一萬五六千金與其任作私規不如改充公費因請撥銀一萬兩作爲五部侍郎公費每歲各分二千金以資貼補餘數千金卽充軍署公費等語查倉差一節本係外辦章程此次提充公費自爲化私爲官正辦但一經歸公胥吏豪強無所沾染雖保不額外需索仍致累及

貧民應令轉飭各屬認真稽查如有仍前包攬訛案等弊立即從嚴懲辦毋稍疎縱此項公費應准提歸將軍五部衙門以資津貼又原奏內稱以上章程均係本省緊要關鉅奴才審時度勢僑極焦勞既不敢稍涉矜縫尤未便過於操切挽回大局略具於此等因該將軍揆度時勢詳細酌核自係實在情形所稱其餘文武各屬已往之短姑請免究後來之咎必予嚴參之處擬請照所議辦理並請 勅下該將軍認真整頓核實勸懲以挽頹風而臻上理 上諭前因崇實等奏請變通奉天吏治章程及州縣各官仍請變通辦理各一摺當經先後諭令軍機大臣六部九卿會議具奏茲據奏稱該署將軍等所陳係屬實在情形均請照准等語即著照所請盛京將軍一缺作為管理兵刑兩部兼管奉天府府尹准其仍照各省總督體例加銜所有刑部及奉天府旗民一切案件悉歸總理奉天府府尹一缺准其加二品銜以右副都御史行巡撫事旗民詞訟命察案件悉歸該府尹管理五部侍郎即照此次所奏恪遵例案各專責成奉天府治中一缺著即行裁撤改為奉天驛巡道該處各屬州縣等缺准其照熱河之例滿漢兼用州縣各官均加理事同知通判銜所有旗界大小官員祇准經理旗租緝捕盜賊毋許干預地方公事奉天為陪京重地從前狃於故習積弊已深經此次變通章程崇實等務宜實力奉行認真整頓所有陋習等項悉數革除地方文武各員並著該署將軍隨時稽查核實勸懲如有不肖之員仍蹈故轍者即行據實嚴

參毋稍徇縱其餘未盡事宜仍舊隨時酌度情形奏明辦理○戊子召貴州布政使林肇元入覲○庚寅命雲貴總督劉長佑連赴新任○辛卯給事中黃槐森奏伏查各省大概情形約計其弊足以耗國用者有二足以斂民怨者有三而求除其弊者則責在督撫大吏臣謹就管見所及者爲我皇太后皇上敬陳之一州縣交代宜清也臣聞各省州縣催收民欠侵挪肥己虧空款項或數千金或至萬金上司以爲難於追繳則責令新任認欠始委接任而其涸民歸歎不計也而其復至虧空又不計也乃吏爲虧空者設法調劑委以美缺冀其完繳愈至虧空愈爲彌縫愈多差委是率屬以效尤而不顧庫歛之日絀也此耗國用者一稅厘各局冗員宜裁也臣聞各局委員自道府州縣佐雜等官每局多則數十員少亦十數員每月薪水每員多至百餘金少亦數十金在上司借以調劑候補人員而不知多一委員即多一費用亦多一弊端縱無串同舞弊收多報少訛案私飽等情而每年薪水糜費已不可勝計矣此耗國用者二臣所謂斂民怨者何夫爭訟民之常也理訟則官之職也彼貪酷官員賄託偏斷或故入以罪威嚇勒詐無論也往往有書吏差役唆使成訟多方索勒及有牽押人犯卽置之囹圄囚汙地絕其飲食私刑逼勒得銀乃休而官不加察復延案不結或訊斷不公甚至積忿成仇釀成械鬪傾家蕩產實爲亂階此斂民怨者一也至催科官之責也拖欠則民之罪也該管官或到鄉坐催或發票差催自應飭股丁

地保指傳的丁勒追乃固有縱差到處私拿或同鄉紳耆或同姓富戶不問的丁與否卽鋼禁差館勒銀方釋不滿所欲則牽混寧官復爲羈押勒令完吏爲刑逼重罰以飽私囊而的丁之欠仍不註銷是視民爲魚肉也此歛民怨者二也若夫釐卡稅廠設立巡丁巡船以防走漏法本善也漏稅之貨物該罰懲治法至公也乃聞有巡船巡丁到處緝私半途截拿遇有未經到關貨物則遽指爲走漏卽呈有查驗放行執照稅單復行留難查勘倘有客商零碎等物件應行免稅貨物卽私勒罰銀盈千累百仍遇其寬免並無勒索甘結始爲放行否則解送大關嚴罰刑訊復不論已稅未稅貨物連船一併勒具充公甘結或將貨并船統計價值八成折罰違例留難勒索巨款營私害民此歛民怨者三也以上各條各省情形大概如此若非力除其弊將糜費歛怨日甚一日於國計民心大有關係臣擬請旨飭下各省督撫關監督認真查辦州縣交代則清算完繳逾限立卽參懲不得寬令新任認欠墊還亦不得縱縫調劑委差調缺以開貧酷而實效尤整稅各局則察看情形有可裁併者裁撤之不能裁撤者酌裁冗員不得以河港分歧事務繁瑣爲詞以開弊端而糜浩費至於理訟則責成各府州縣秉公訊結無任吏役索費私刑逼勒及延案偏斷致釀禍端俾科則祇追的丁無任連累無辜紳民聽從差役私拿勒索致滋擾害若釐卡稅廠往來商船未經到關及已給有查驗放行票據者無任緝私巡丁巡船中途留難妄捏走漏並強

以應免准免貨物勒令完納如有以多報少准將不符之貨物計值議罰無任全將已稅之貨物連船統計價值議罰及勒其貨船遵行充公甘結以國中飽而累商民如查有前項弊端立即從重懲辦毋妄積習毋為朦蔽毋事粉飾隱情庶國計裕民心固而上理可期矣 上諭給事中黃槐森奏敬陳管見請興利除弊一摺各省州縣交代本應遵照定章核算完繳乃上司意存見好逾限不即奏參或責令新任墊還或另委他缺調劑殊不足以示懲儆著各該督撫破除情面將各州縣交代勒限清釐追繳逾限未完卽行照例參辦毋許稍涉瞻徇擬稅各局委員過多既耗公款更滋弊端著各該督撫監督體察情形將各局酌量裁併並將局中冗員隨時裁汰以杜虛糜訟獄關係民命尤當加意矜恤著各該督撫嚴飭屬員遇有詞訟案件迅速秉公訊結毋得遲延並嚴禁吏役需索私刑逼勒等弊俾免冤抑各州縣催征錢糧不得縱容差役妄拿平民肆意勒索致滋擾累至釐卡稅廠設立巡丁巡船原所以防走漏何得將商民貨物中途截拿故意留難冀飽私囊如有前項積弊卽著嚴行懲辦毋稍寬縱○哈祭 太廟遺奕廳恭代行禮○予福建陣亡提督張光光等入祀昭忠祠事蹟交國史館立傳○諭沈葆楨奏寶鏡提鎮現帶防營懇請從緩赴任一摺新授福建陸路提督唐定奎新授直隸正定鎮總兵吳長慶現在江南統帶防軍尙屬得力著准其從緩赴任仍留江蘇統領防營以專責成所遺各缺著李鶴年李鴻章派員署



理○壬辰諭鮑源深奏參營官不安本分請旨撤銷保案降補等語營官記名總兵甯世忠因帶隊不力經該撫撤退後輒敢以發過勇糧等項捏借墊稟請給發實屬有意朦混不安本分該撫所請撤銷保案以參將降補之處尙屬輕縱甯世忠著卽行革職其搭蓋營房失查勇丁拆動漫牆磚石並著迅飭該統領查明責令趕緊賠修倘敢玩延卽行從嚴參辦○是月日本國新簡駐華使臣森有禮抵任○是年祕魯國遣使臣愛勒謨來駐我國是爲祕設駐使之始○統計全年出口貨值銀六千八百九十一萬二千九百二十九兩進口貨值銀六千七百八十萬三千二百四十七兩相抵贏一百十萬九千六百八十二兩凡徵貨稅銀一千一百九十六萬八千一百九兩

聖朱壽朋敬編

臣潘鴻鼎恭校

光緒二年丙子春正月癸巳朔丑刻 上詣 泰先殿行

慶皇太后 慈禧端佑

康頤皇太后御慈寧宮 上率諸王大臣行禮畢御 中和殿受禮 太和殿受賀○乙未 上詣 壽

皇殿行禮○左宗棠奏哈密辦事大臣兼帶馬步裁併實數籲請飭撥有著專款定限撥解以資整頓下

戶部議○丁酉左宗棠奏新疆北路臺站應由烏魯木齊都統科布多大臣烏里雅蘇台將軍聯次安設

從之○戊戌諭御史吳鴻恩奏請飭舉行宣講一摺宣講聖諭廣訓鉅典昭垂自 聖真舉辦乃近來各

地方官往往視爲具文實屬不成事體著順天府五城實力奉行並著各直省督撫學政督飭地方官及

教職各官隨時宣講毋得有無實另片奏請飭學政嚴密關防等語科場舞弊例禁森嚴若如該御史

所奏揜冒頂替等弊仍所不免並有教職與承差勾通作弊情事殊堪痛恨著各直省學政隨時稽查如

有前項情事卽著嚴行究辦以端士習而肅官方○己亥諭軍機大臣等左宗棠因出關餉需緊迫擬借

洋款一千萬兩事非得已若不准如所請誠恐該大臣無所措手於西陲大局殊有關繫著沈葆楨卽照

左宗棠所奏妥速籌議奏明辦理○諭軍機大臣等前據左宗棠奏出關需餉孔亟擬借洋款由沈葆楨查照奏防成議辦理當交該衙門速議具奏茲據總辦各國事務衙門戶部奏稱西征軍務緊要請飭各省迅解協餉並准其借用洋款等語西征軍餉前經該部議令將上年指撥各省關的餉一百二十萬兩由該將軍督撫查明欠解若干限一箇月內全解至積欠西征軍餉二千六百十餘萬兩限一年內提解一半並經該部會同總理各國事務衙門奏明各督撫應將西征海防各餉各按各款清解不得因有滯防撥款將西征各餉延欠嗣經譚鍾麟奏請提年終一月滿餉該部議照成案於浙江等省積欠協餉內提銀六十萬兩據左宗棠奏稱各省關應解協餉截至上年十月止僅收過銀二百六十餘萬兩比常年短至一半其指提年終一月滿餉僅據浙江四川山西報解銀十五萬兩此外尙未起解實屬延玩著該將軍督撫遵奏前旨查照該部各前奏將指撥出關的餉及年終一月滿餉卽行照數完解不准稍有帶欠各省關原協添協西征各餉江蘇月協銀八萬兩江西月協銀六萬兩福建月協銀四萬兩河南月協銀一萬五千兩除同治十二年改撥毅軍運資外仍月協糧餉晉餉銀一萬兩湖北月協並應協糧餉晉餉銀八萬兩廣東月協銀七萬兩湖南月協銀一萬兩山東月協銀一萬二千兩山西月協並應協糧餉晉餉銀五萬兩又河東月協雷正箱餉銀五千兩安徽月協銀二萬兩四川月協銀四萬兩閩海關月協

雷正綰餉銀二萬兩浙江月協銀十二萬兩各該省歷年撥解之數有過半者有不及一半者惟湖南止解三分之一河南撥解不及十分之一廣東福建四川欠解亦多殊屬不成事體著將河南暨湖南廣東福建四川各藩司先行交部議處並著照所議將光緒元年以前積欠舊餉除專案指提外暫予緩商其自光緒二年起所有應協西征新餉著該將軍督撫查照每年應協款目按三四年前撥解之數力籌措解統於每年年終核計如不能照原撥添撥數目解至八成以上即將該藩司監督照貽誤京餉例由該部指名嚴參該將軍督撫務當實力督催嚴飭各該藩司監督按月源源報解俾無要需至借用洋款本非善策前經該衙門奏明嗣後無論何省不得輒向洋人籌借惟左宗棠因出關餉需緊迫擬借洋款一千萬兩事非得已若不准如所請誠恐該大臣無所措手於西陲大局殊有關係著沈葆楨即照左宗棠所奏妥速籌議奏明辦理以期無誤事機除按照成案由各關分年撥還洋商外即由該部所議各省應協西征新餉款內自本年起分年撥還國家經設有常此次籌借鉅款係合天下之力辦西陲軍事竭十餘年之力辦今日軍事似此辦法實屬可一而不可再左宗棠當仰體朝廷籌餉之艱振刷精神將新強軍務迅速籌辦著即會商金順的選精銳鼓行而西以次剿除烏魯木齊吐魯番等處匪綏靖邊疆總期早日告竣藉紓餉力儻稍事遷延徒糜鉅款則以後供支勢將曷繼左宗棠素顧大局諒不至日久無

功致干懲處也將此由六百里諭知左宗棠文煜沈葆楨李鶴年劉坤一翁同龢張兆棟吳元炳裕祿劉  
秉璋楊昌濬丁日昌丁寶楨鮑源深李慶翱譚鍾麟王文韶並傳諭文格李文敏知之○庚子時亨 太  
廟遣德長恭代行禮○以恩承兼署戶部左侍郎○壬寅御史吳鎮奏 昨閱邸抄 皇上欽奉 皇太  
后懿旨著於明年四月詠吉入學以署侍郎翁同龢侍郎夏同善授讀所有一切事宜著醇親王妥為照  
料嗣後不允翁同龢等所請著確違前旨毋辭欽此在翁同龢等受 恩既重受 知亦深自當盡心納  
諫何敢固辭上頁 簡命惟任大責重既信用君子以資輔導之力尤宜嚴斥小人以杜匪僻之緣今之  
小人至近莫如宦寺此輩性多陰柔揣摩最熟迎合最工言甘則易入事秘則難察往往以詭隨之計且  
託為忠愛之忱雖有天覆之聰明不能不為之蔽雖有臣工之講貫不能不為所淆日積月累至罪惡昭  
著縱與以嚴譴何補哉 愚以為與其懲之於後不若慎之於先伏讀周書有曰昔在文武聰明齊聖  
小大之臣咸懷忠貞其侍御僕從罔非正人出入起居罔有不欽發號施令罔有不臧可見古人於入訓  
出保而外未嘗不於左右近習尤加謹也茲當 聖學之初應請 旨飭下 掖廷宦侍務選老成恂謹  
者以供其役至若便辟巧佞之流概屏弗用仍 諭令醇親王隨時稽察倘有稽習未化前後易轍者立  
予懲治使此輩咸知敬畏俾儒臣得盡啟沃 皇上之所以日進緝熙者在此 皇太后之所以上告宗

廟者亦在此欽奉 慈安端裕履慶皇太后 慈福端佑康頤皇太后懿旨御史吳鎮奏請慎擇宣寺傳  
儒臣得盡敬沃一摺皇帝於明年四月入學允宜黜邪崇正日進緝熙所有毓慶宮一切事宜前經降旨  
命醇親王妥為照料其隨侍太監自應慎選恂謹老成之人以供服役著該王等隨時稽覈如有積習未  
化前後易轍者卽立予重懲用示杜漸防微至意○甲辰予故原任浙江巡撫王有齡列入福建福州府  
祀典○予湖北殉難安陸縣知縣萬成建祠入祀昭忠祠事蹟交國史館立傳○優卹故福建總兵未桂  
芳並予附祀王凱奏臺灣府專祠○予湖北殉難紳民婦女熊家望等四百五十八名立祠建坊○丙午  
上詣 泰先殿行禮畢詣 壽皇殿行禮○以孝慈可風予命婦戶部侍郎榮祿繼母顏扎氏旌表○  
丁未 上詣 大高殿行禮畢詣 壽皇殿行禮○予湖南平江縣貞女唐周氏旌表○己酉以魁齡兼  
疆吏部尚書景廉署步軍統領○以安興阿署鑲白旗滿洲都統明燾署正黃旗蒙古都統景壽署正紅  
旗滿洲都統○調楊玉科為廣西右江鎮總兵○諭胡中和著卽速赴本任四川總督著聯昌署理○辛  
亥祈穀於 上帝遣奕齡恭代行禮○甲寅戶部右侍郎溫葆深以病免○乙卯諭朕奉 慈安端裕康  
慶皇太后 慈福端佑康頤皇太后懿旨三載考績為國家激揚大典中外滿漢諸臣有能職守恪共勞  
勩最著者允宜特加甄叙以示優眷茲當京察屆期吏部開單題請詳加披閱恭親王首魁樞廷殫心匡

曠靖共夙夜歷久彌勤懋著勳勞深資夾輔著交宗人府從優議叙大學士文祥寶黎協辦大學士兵部尚書沈桂芬工部尚書李鴻藻同心贊畫勤慎益昭均著交部議叙大學士直隸總督李鴻章宣力畿疆卹敵卓著大學士陝甘總督左宗棠督師邊塞備極勤勞均著交部從優議叙○以翁同龢爲戶部右侍郎潘祖蔭著刑部右侍郎○丙辰祈禱 上親詣 大高殿拈香○丁巳以捐資贖族予湖南紳士長察使銜直隸委用道楊澍等議叙○己未以恩承兼署吏部左侍郎崇綸兼署戶部左侍郎○劉長佑奏臣於光緒元年四月二十五日奏請將土田州革去世職其地改土歸流一案五月十一日奉 旨該部議奏欽此八月接准部咨查恩恩府屬之土田州一缺原係土人岑氏後裔承襲今據該撫等奏土知州岑乃齊病故無子族衆支分爭鬩分黨仇殺土民流離轉徙日不聊生來營泣訴苦狀均願歸流官管轄不願復爲岑氏土民應請將土田州知州革去世職其地改設苗疆知縣一員其恩恩府屬白色同知與鎮安府屬秦議州判二缺酌量升爲苗疆直隸屬簡缺知州以資治理等語自應准如該撫等所請添設苗疆知縣一員白色同知改爲苗疆直隸州秦議土州州判改爲簡缺知州並令該撫體察情形通籌全局及一切未盡事宜詳細奏明辦理等因具奏奉 旨依議欽此咨行到粵臣欽遵督同藩臬二司詳飭委員梧州府知府徐延旭暨該管道府等將一切事宜細心體察妥籌酌議去後旋據陸續稟呈前來

臣與兩司等通籌全局查土田州地方內外共分十里每里分三都每都分四圖每圖之廣袤十里二十里不等多與白色廳奉議州緊相毗連今請改流應於燕喇緊要之地設立知縣一員作為苗疆衝緊要缺管轄上陸下隆上恩下恩上田里及篆里之一二三都等處擬請名縣曰恩隆其餘各里附近白色者撥歸白色管理將白色同知升為苗疆直隸州即以恩隆新縣屬之附近奏議者撥歸奉議管轄即將奉議州判升為簡缺知州以資控制新設之恩隆縣清查田畝丈量升科每年應徵地糧銀二千九百九十兩零應徵兵米一千四百三十二石零添設訓導一員文武學額各四名廩生增生各二名四年一貢並添設縣丞一員駐防上田里平馬墟又分防下隆里巡檢一員上恩里巡檢一員篆里巡檢一員典史一員其營制添設恩隆營守備千總各一員駐紮縣城把總一員分防隴田外委把總馬戰兵二名分防下隆篆里額設馬戰兵五名步戰兵三十七名守兵八十八名俾資守禦防緝又新升苗疆白色直隸屬同知經管龍篆武隆下田里篆里之四都應徵地糧銀一千五百二兩零本色米一千七十三石零督徵楊萬土州判解屬轉運地糧銀二百三十八兩添設學正一員文武學額各四名廩生增生各二名四年一貢並設照磨一員該屬既已升為直隸州毋庸再屬思恩府以符體制又新升奉議簡缺知州該州原設有崗窰徵地糧銀四百八十四兩零無崗窰實徵地糧銀四百六十三兩零新編中田里地糧銀一千三



十二兩零本色兵糧米八百一石零並添設吏目一員該州原定學額三名廩增生各一名四年一貢擬請增設文武學額各一名其廩增生均循原設該州仍屬鎮安府以符舊制據藩司嚴樹森營臬司周景鼎分晰造冊會詳請奏前來臣覆加體察無異相應請旨勅部分別議覆如蒙恩允臣遵當按照新設文武各缺分照例遴員請補募兵如額督同司道協營嚴飭各該文武員弁講求治理勤慎操防一洗從前土規陋習以奠民生仰副聖朝軫念邊氓綏靖疆圉之至意下部議奏○庚申予故刑部侍郎前直隸河間府知府吳廷棟入祀直隸省城及河間府名宦祠○予故大理寺卿前直隸大順廣道王榕吉入祀直隸順德大名各府名宦祠○壬戌諭魁玉吳榮奏剿辦蠻匪肅清請將出力員弁獎叙一摺四川街波屬蠻匪恃眾滋事經吳榮派兵剿辦擒獲首魁抗拒上年秋間提督胡國珍等帶兵分道進攻迭克堅巢殲除首逆蠻眾一律收撫全境肅清剿辦尚為妥速仍著督飭該將領等將善後事宜妥籌辦理以竟全功此次出力之知府張世康著賞給富隆阿巴圖魯名號並賞加鹽運使銜提督胡國珍著賞換喀爾莽阿巴圖魯名號並賞給該員三代一品封典總兵邵永齡著以提督記名簡放並賞給該員三代一品封典同知吳之桐著賞換花翎提督王聚蘭著賞換國勇阿巴圖魯名號降調知縣國璋著州復降調處分仍以知縣留於四川歸候補班補用總兵唐珊峯著賞給勅勇巴圖魯名號並賞給該員三代一

品封典副將蔣事雋以總兵記名簡放並徵給銳勇巴圖魯名號降補守備王仕明著開復遊擊原官留於四川儘先補用千總李鴻順田錦德均著免補守備以都司儘先補用並賞換花翎把總向華庭軍功彭祖年均著以千總儘先拔補並賞戴藍翎其餘出力員弁兵團著准其擇尤彙案保獎毋許冒濫雷波糧通判陸浩於撥匪滋事未能先事防範例有應得之咎惟隨同官軍進剿尙知愧奮著開缺留省另補以示薄懲○是月美利堅國新簡駐華使臣西華抵任

二月癸亥朔雪○岑毓英奏捐廉建立昭忠新廟將援陣亡瘞故文武員弁及勇丁人等一併入祀籲請列入祀典允之○乙丑 上詣 大高殿拈香祈雨○諭軍機大臣等未親政以前恭遇 太廟時享

及祫祭大祀均於致祭前一日親詣行禮著以本年孟夏爲始○予四川銅梁縣烈婦宋湯氏旌表○丁卯祭 先師孔子原遺寶案行禮○廣甘肅文闈鄉試中額十名○浙江學政胡瑞澐奏請申明科場定例嚴除積習下禮部議○戊辰移湖北江夏縣清黃巡檢駐均州孫家灣以江夏縣縣丞移駐清黃專司水利○己巳沈葆楨奏等承准軍機大臣字寄光緒二年正月初七日奉 上諭左宗棠因出關餉需緊迫擬借洋款一千萬兩事非得已若不准如所請誠恐該大臣無所措手於西陲大局殊有關繫著沈葆楨卽照左宗棠所奏妥速籌議奏明辦理等因欽此仰見 朝廷軫念西陲救民水火之至意查左宗

棠原奏濬陳餉源枯竭萬不得已而議借洋款在該督臣勞心焦思獨撐危局撫士卒於飢疲削病之餘籌餉運於雪海冰天之外仔肩艱鉅冠絕一時等語奉任封圻誼均休戚如果於事有濟曷敢稍存推諉况上海為洋商精華薈萃之地關道所屬多洞悉洋情之員以利招之一呼百諾江南自兵燹後宜修舉廢墜刻不容緩者殊多特以度支匱於轉輸馴致遷延歲月關隴費有巨款支拄協濟稍鬆江南及是時為自顧之謀計亦誠便而臣等夙夜不寐反覆再四竊慮此舉有病於國關係最大即西陲軍事稍紓目前之急更貽日後之憂不敢不將實在情形為 皇太后 皇上縷晰陳之竊惟國債之說徧行於西洋各國受病相去懸絕則以舉債之故不同而所舉之債亦不同也夫開礦造路挖河巨費也而西洋各國不惜稱貸以應之者蓋刻期集事課稅出為本息之外尚有奇贏所謂以輕利防重利故英美等國有國債而不失為富強若以國用難支姑為騰挪之計後此息無所出且將借本銀以還息銀歲額所入盡付漏卮目下如西班牙土耳其皆將以債傾國日本亦駭駭乎蹈其覆轍矣此舉債之故之不同也英美舉債於本國之商國雖病而富藏於民有急尚可同患若西班牙等國輸息於鄰封一去不能復返此所舉之債之不同也昔歲臺灣之役本省羅加一空外省無絲毫可以協濟急何能擇出此下策然以新疆較之局面之廣狹事體之難易相懸奚啻霄壤蓋地東西二三百里南北千有餘里日本負負然深

入絕地雖有必死之志而無可久之資堅與相持情見勢屈倘照原議借款六百萬則善後之事以次備舉煤礦茶山所出漸足餽軍一借斷無須再借嗣因借過二百萬倭事業已定局部議飭令停止並葆楨卽不敢再申前議新竊廣袤數萬里戈壁參半回部本其土著根深蒂固既無盡剿之理又無乞撫之情似非一二年間所能就緒卽使事機至順逆回弭首諸城盡復與俄爲鄰互市設防正重煩 朝廷筆畫而非放牛歸馬之時也洋人肯以巨款借我者恃有海關坐扣如取如摺也洋人取之海關海關仍待濟於各省向日各省僅辦協餉已催解不前今令兼籌協餉之息能如期以應乎協餉逾期而海關病海關無可彌補不得不虧解部之款而部庫病雖日取各省督撫藩司而効之餉項祇有此數此盈則彼絀劫取則霖涸坐待嚴譴而無可如何前屆左宗棠借洋款三百萬計息蓋七十萬若以此七十萬供西征之餉未必不少有裨補今以一千萬照臺灣成案八釐起息十年清還計之耗息約近六百萬不幾虛擲一年之餉乎若照數乘除則西征僅得四百餘萬實餉耳前屆之三百萬至光緒四年始清而續借之一千萬今年卽須起息明年卽須還本海關應接不暇而西陲之士飽馬騰不及兩年涸可立待進兵愈速轉運愈難需餉亦愈鉅將半途而廢乎勢必不可將責各省於還債之外另籌解濟乎勢又不能將再借洋款乎海關更無坐扣之資呼亦不應徒令中興元老困於絕域事豈忍言者此等所以反覆再四而不

敢爲孤注之一擲者也夫以出關之事之急左宗棠籌借洋款本有成案不違委員徑向洋人定議而謀之於臣葆楨 諭旨又飭臣葆楨妥速籌議奏明辦理則萬難盡善之處已在 聖明洞鑒二三老成燭照數計之中如臣等豈不分畛域之名固顧事後之無可收束於心竊有所未安然謂西征可停則臣等又斷斷以爲不可何者我退則敵進關隘且因而不靖徒棄 祖宗辛苦艱難締造之地而列戍防秋勞費亦復相等顧臣等竊以爲左宗棠此行不當效霍去病之插穴犁庭而當帥趙充國之養威負重將帥無赫赫之功而 國家受萬全之福誠能扼其衝要豎壁清野開水利廣屯田考畜牧關外多一分之產關內卽省一分之運反客爲主脅從者稽首歸命渠魁亦束手就縛較之糜血肉於堅城之下求萬有一然之勝其得失可同日語耶夫甘餉之鉅困於餽運耳餽運省則一年之餉可支兩年目前不能不飭各省勉力籌濟 臣請 朝廷發曠代之德音以內庫爲之倡 皇太后 皇上躬行節儉度越尋常豈復有不急之需可以議裁議減者然其數不在多但得 明詔數言足以激將士敵愾之心而生驅走同仇之感左宗棠原奏深言甘餉爲海防所估惟江西浙江兩省尙能力顧大局查海防專款奉撥購將經年臣葆楨恐分之則爲數愈微咨請各省儘解北洋冀可藉資集事而去歲所報解者亦僅江西十萬浙江十萬他省涓滴俱無可見各省非有所偏倚於其間限於力耳此時各省未必尙有留存巨款以待撥權

各省原撥陝甘之款有解不及半者雖添撥亦徒擁虛名應懇 敕下部臣熟權緩急將有著之款移稍緩者於最急之區庶幾各省關可以勉強從事如江蘇協甘之款內有每月一萬歸陝西撫臣收放竊計陝西肅清多年本省防軍不難自籌一萬此款似應歸之西征江西派協雲貴之兵餉勇餉爲數頗鉅夫雲貴未嘗不急然較之西征則緩矣凡類此者似宜由部臣通盤比較酌量勻撥至遣使之舉已有成議然數道並出則所費不貲應請除已奉 諭旨者准行外其餘且作緩圖俾部庫得以周轉 上諭沈葆楨等奏籌議關外餉需擬難借用洋款暨江蘇擬力籌西征協餉各摺片據稱借用洋款耗息甚多海關部庫均受其害應於各省關移緩就急並江蘇竭力籌措等語所陳亦屬實在情形西征餉事甚殷自當通盤籌畫於國計軍餉兩無妨礙方爲有濟應如何斟酌盡善之處著左宗棠妥爲籌畫迅速具奏原摺片著鈔給左宗棠閱看沈葆楨所請將湖北湖南協濟江防銀兩移解西征糧臺濟用俟左宗棠覆奏到日再行降 旨○辛未諭本年輪應查閱湖北湖南雲南貴州四省營伍之期湖北卽派翁同龢湖南卽派王文韶雲南卽派劉長佑貴州卽派黎培敬逐一查閱認真簡校如有訓練不精軍實不齊者卽將廢弛之將弁據實參奏毋得視為具文○吳元炳奏州縣以上候補各官統行考試並擬定月課章程下吏部知之○癸酉諭瑞敏郡王之嫡福晉薨逝著派總管內務府大臣師曾前往照料一切喪儀著照郡王

福晉之例官爲辦理○崇實奏奉省沒溝營因係通商口岸同治五年改設海關道經前任三口通商大臣會同前任將軍奏請於各旗挑選精兵駐紮該處訓練洋鎗隊伍每屆二年由山海關道擇尤請獎詳由直隸督臣會同將軍分別奏咨保獎一次在當時事係創始不得不從優定議冀以鼓勵人材計今年之久歷保四次所有勦番各員業經迭遞恩獎且現在海口安謐不過以操爲防若再循照舊章二年請獎一次人數又多實於旗營升途不無窒礙擬請略爲變通嗣後改爲每屆四年准其擇尤保獎一次不必拘定成數庶足以杜冒濫而昭核實從之○甲戌以德長署鑲黃旗蒙古都統○沈葆楨奏奉光緒元年三月初三日 上諭沈葆楨奏請調道員段起堯委段起現在來京已諭吏部勅令該員前赴臺灣惟聞該員向有嗜好著沈葆楨留心察看等因欽此○內渡後接見段起當將帶同該員前赴江南以便遵 旨察看不敢稍存成見緣由奏明在案○與同駐船政二次兩月有餘同再駛赴金陵至今又逾三月隨時隨事觀其所忽實見其孜孜講求吏治於立身義利之界辨析甚嚴其忠奮有爲與十年前一轍而退讓之度有加焉兵部侍郎彭玉麟嫉惡之嚴世罕倫比移書論段起人才首以剛健篤實認之蓋段起生同里閉稔其素行也久矣合無仰懇 聖恩准將段起暫留江南差委仍令照例坐補江西督糧道原缺以遂其退讓不妄干進之心倘將來該員有篋篋不飭及世俗煙酒嗜好與同罪所不敢辭得

旨如所請行○崇實等奏上年剿辦大東溝地方經費才崇實奏請撥餉十萬兩以濟軍需本擬如有不敷再行續請添撥仰仗 天威旋將大東溝不日蕩平並平定廟兒溝通溝各處邊外一律肅清用款尙有盈餘所有辦理善後事宜自應遵照同治五年王大臣等原議以彼處之所入供彼處之所需俾流民永遠相安不致更煩 需項此次大東溝所收地租木稅各項均經分款存儲由奴才等另行籌款墊發委員薪水並置房屋雇募民勇添設書吏等用原爲涓滴歸公以免輾轉起見現在既經收有小數錢一百四十餘萬串合市平銀十二萬兩有奇刻屆春蠶亟須補查六莫地畝及趕辦通溝一帶善後地方邊關需款甚多擬於木稅地租項下先行各扣四成以充公費倘不敷用再由奴才等酌量添撥當此開辦伊始一切用費勢難拘定成章只有由奴才等撙節爲用認真稽核督飭各委員等實用實銷以免虛糜而重款項報聞○乙亥 上諭 大高殿拈香祈雨○以安興阿著鑲藍旗漢軍都統○丙子諭軍機大臣等崇實奏請調古北口練軍一摺奉省通溝一帶現正辦理善後事宜巡緝分防均關緊要該處兵力不敷分布著派撥古北口練軍步隊一營馬隊一百五十名統由熱河徑赴奉省○戊寅崇實等奏奴才等曾於上年五月間片奏辦理善後必須出色人員始能取其成效如有才具出眾能將此事始終辦妥之文武各員從優保奏又於十二月間奏請破格用人隨時鼓勵遇有實心任事著有成效之員卽



行具奏保奏均經蒙 恩允准欽遵在案伏查大東溝善後事宜撫綏安插以及抽收稅課清丈地畝佈

置著稍失宜關係卽非淺鮮經 叙才等奏派陳本植恆泰等前往相度機宜妥籌辦理現在失教之民均  
經歸化私墾之地昔律升科且邊外水利久爲匪徒所爭今經改私爲官徵收稅課數盈鉅萬該員等始  
終其事實非尋常勞績可比自應遊 旨從優保奏隨時鼓勵所有首先承辦之花翎直隸候補道陳本

植力果心精才堪任重請 賞加二品銜並給三代從一品 封典花翎道員用四川候補知府恆泰老

成精細練達有爲擬請免補知府以道員仍留原省儘先補用並 賞加按察司銜其餘各員弁均能不  
辭勞瘁潔己奉公若非量予獎叙不足以鼓舞人材茲擇其尤爲出力者開單恭呈 御覽合無仰懇

天恩俯准一體獎叙出自逾格 鴻施得 旨陳本植等及單開各員均著照所請獎勵○己卯以景廉

署正白旗蒙古都統皂保署正藍旗滿洲都統○辛巳以津郡建築海口新城砲臺工程告竣獎叙出力

員弁有差○癸未允左宗棠奏賞駐鄂總理陝甘後路糧臺道員王加敏從一品封典○乙酉 上詣

大高殿拈香祈雨○左宗棠奏甘肅軍事以籌糧餉運爲最難而採糶轉運均非巨餉不辦轄境苦瘠甲

於天下地廣人稀回亂以來僅存子遺不及承平時十分之一非賴各省關協濟無所措手仰仗 皇威

遐暢東自滄關武關西迄嘉峪南至巴蜀北至蒙古周數萬里一律澄清是則疆圉諸臣之大有造於西

土也經核西征糧臺開送各省關連年籌解協餉銀數清單如福州將軍督理閩海關文煜前兩江總督李宗羲湖廣總督李瀚章前任江西巡撫升任兩廣總督劉坤一四川總督吳棠前署兩江總督江蘇巡撫何璟浙江巡撫楊昌溶廣東巡撫張兆棟山東巡撫丁寶楨署山東巡撫漕運總督文彬安徽巡撫裕祿前任湖北巡撫郭柏蔭前任江蘇巡撫張樹聲前任山西藩司升任河南巡撫李慶翱前任江西藩司升任江西巡撫劉秉璋署漕運總督江蘇布政使恩錫於西征餉事均極盡心凡可設措之處無不力為經營以求有濟惟彼此均膺疆圉重任在奉公不敢代為妄請獎叙其協餉成數多寡欸目分明亦無稍掩飾也其各省關河道監督籌解協餉實數有五分以上者有至十分者皆能顧全大局力濟時艱解餉各員歷奉委解勞瘁不辭亦無貽誤自應併案獎叙茲核明勞績分別繕單具陳籲懇 恩施又隴中調兵儲糧饋運非各路並籌難資接濟勞費未可殫述軍裝子藥及軍需一切應用之物多取資他省水陸迢遞輓繁難除糧臺及採運局外沿途設局督催接運地方州縣悉心照料不能妥運局員非實心奉公廉能耐苦又無以勝繁劇而任險艱然有志之士每謂軍前差使著績不同輒思赴前敵圖功致後路委任頗有乏才之嘆 因擇年老最久才具素優者多方激勵許以辦理周妥一體叙功故數年來在事員弁各知奮興軍用得無缺乏至本省各屬即委辦理善後百廢俱興雖屬分所應為然當此

三空四盡之時措措不遺猶能勉趨公經營績勞績亦異常據各路臺局及本省甬道開單請保前來詳加覆核其在事出力未久者均一律核刪俟續有勞績另行彙案辦理俾昭核實所有此次列保文武員弁均盡心職守出力有年保獎階級雖略有與部章所謂尋常勞績不符者究與各軍營已有區別謹一併繕列清單恭呈 御覽下部議奏○丙戌以捐資贍族古誼可風賞給陝西總兵劉厚基母羅氏 御書匾額○丁亥朔 日於東郊道本格格恭代行禮○戊子予浙江烈婦張高氏旌表○己丑以景廉署工部尚書廣壽兼署吏部尚書○以載容署鑲紅旗漢軍都統○賜命婦原任漕運總督袁甲三母袁郭氏祭○以因公遇難優卹江蘇補用道李光熙提舉銜補用運判李培清○庚寅宮爾孫奏仁浦天后宮保安城兩處砲臺暨陳山嘴砲臺工程一律完竣報關○辛卯諭嚴樹森奏土族滋事派軍剿捕生擒首逆請將出力陣亡各員分別獎卹一摺廣西陽萬州土州判岑潤吉主謀倡亂勾通田州土族岑耀青等聚眾滋擾佔踞村墟經嚴樹森飭令署總兵達三等分投剿捕剋日將岑潤吉等先後擒獲訊明正法在事各員尙屬著有微勞自應量予獎勵所有單開之副將達三等以總兵記名簡放並賞給提督銜候補同知直隸州知州楊廷瑛著以知府儘先補用並賞戴花翎加鹽運使銜總兵陸純剛著以總兵遇缺題奏並賞給騎勇巴圖魯名號副將黃才貴著以副將留於廣西儘先推補並賞加總兵銜遊擊姚

大瑛著免補遊擊以參將儘先補用知縣胡體輝著補缺後以同知直隸州知州用先換頂戴通判梁學義著免補通判以同知用陣亡之訓導廖干城著照陣亡例從優議卹○予故大理寺評事舉人李元春事實交國史館列入儒林傳○壬辰敕建湘軍昭忠祠於湖北樊城縣○是月荷蘭國使臣費果孫因病回國由英使威妥瑪兼攝之○日斯巴尼亞國以白納託署理使事

三月癸巳朔左宗棠奏宗棠於上年十二月十四日附奏擬俟劉典到關將留防善後諸務商爲商定卽啟行而西劉典十一月二十日由湘啟行沿途風水阻滯樊城登陸入秦度隴雨雪載途感受寒疾仍按程行走二月初八日抵蘭連日商榷軍事及善後未盡事宜均有端緒正值河冰欲泮橋難運架遲至二十一日宗棠始克率親兵十哨白馬氏練丁一營馬隊四起登程前進所部前隊二十四營則已於正月二十八二月初二初八十五等日陸續由涼州拔行分至肅州取齊分起次第繼進大約由肅州以西按臺站行走中途無須停頓山巴里坤達古城十一站應察看地形留駐數營防賊旁竄抵古城後須軍糧取齊乃可趣戰宗棠所帶親兵馬步各營暫駐肅州俟前路糧料運至古城後路肅州安西哈密各有儲積乃可前進其前路進止機宜已面授總理行營營務處西甯道劉錦棠令其相機辦理不爲遙制俄糧之運古城者截至四月可四百八十餘萬斤僅敷金順全軍馬步之需繼進之軍所需糧料

除官私歇驛駝隻裝運軍士自行裹帶外餘均取給哈密巴里坤哈密糧源自甘肅州安西而來巴里坤糧源自歸化包頭甯夏而來遠者五千餘里近者三千數百里截至四月巴里坤存糧可六百餘萬斤安西哈密之糧運至古城者可四百餘萬斤存儲待運者尚千萬斤然勞費已不勝計矣其巴里坤有數徑可達安西不復經由哈密已飭記名提督徐占彪俟 宗棠到肅後帶所部馬步四營駐之哈密則有張曜一軍馬步十二營宋慶所留步隊八百人擇要扼守以防吐魯番東犯之賊如此庶後路常通糧運不墮乃可言勁氣直達也又奏烏魯木齊踞逆本地土回居多逆首白彥虎所帶陝回及甘肅從逆之回踞紅廟子古牧地瑪納斯等處而皆與南路踞逆回會怕夏通怕夏即敖罕部安集延回會和碩伯克也怕夏當即伯克轉音俄羅斯既滅敖罕踞其塔什干都城敖罕所部安集延獨免同治四年乘回部之變入踞南路喀什噶爾及各回城於是土魯番闢展以西土回皆附之怕夏能以詐力制其衆又從印度多購西洋鎗礮勢益猖獗陝甘窳踞之逆及本地土回均倚之爲重然不敢顯然與俄羅斯較是俄兵之強可知俄人頗言其狡悍異於諸賊以敖罕向未用西洋鎗礮安集延多洋鎗隊而怕夏又能用其衆是安集延之強亦可知官軍出塞自宜先剿北路烏魯木齊各處之賊而後加兵南路當北路進兵時安集延或悉其醜類與陝甘窳逆及土回合勢死抗官軍當有數大張仗如天之福事機順利自逆殲除安集延

之悍賊亦多就戮由此而下兵南路其勢較易是致力於北而收功於南也若北路軍威未至而賊先圖自固不敢互相援應但作守局以老我師則曠日持久亦在意中外間議論頗謂軍臨前敵陝甘竄回必有倒戈之事臣不敢信其誠然即令誠然白逆必遁竄入南路安集延未經重創其狡焉思逞之志不忘如其併力繼抗自可獎率師徒爲一了百了之計倘詭詞乞撫仍思踞我陝疆或兵至則逃妄擬乘間竊逞爲死灰復燃之計則新疆隱患方殷豈可不預爲之所議者但以陝甘竄回及新疆各城爲慮不復知有安集延竄踞南路之事或以爲易或以爲難或以爲事可緩圖或以爲功可速就或主撤兵節餉之議或並爲難得易失之談辯說紛紜橫議歧出揆其命意皆因裨益洋防起見豈真由衷之談哉臣本一介書生辱蒙 兩朝殊恩高位顯爾出自逾格 鴻慈久爲平生夢想所不到豈思立功邊城覬望 恩施況臣年已六十有五正苦日暮途長乃不自付量妄引邊荒艱鉅爲己任雖至愚極陋亦不出此而事願有萬不容已者烏魯木齊各城不克無總要之處可以安兵烏魯木齊各城縱克重兵鉅餉將安出康熙雍正 兩聖爲之旰食者準部也乾隆中準部既克續平回部始於各城分設山府然後九邊靖謐者百數十年是則拓邊境腴疆以養兵之成效也今雖時易世殊不必盡遵舊制而伊犁爲俄人所據喀什噶爾各城爲安集延所據事平後應如何布置尙費編繹若此時即置之不問似後患環生不免日感百

里之慮區區忱竊有不敢不盡者 上諭軍機大臣等左宗棠劉典奏會報抵蘭出塞日期左宗棠奏  
新疆賊勢大概情形請籌洋款四百萬兩丁日昌奏洋債不宜多借各摺片覽奏均悉劉典現已馳抵蘭  
州所有關內關外各事宜左宗棠業已統籌全局布置妥協督率馬步各營分起西進爲規復新疆各城  
之計足見公忠體國力任其難該督抵肅州後應如何次第進兵之處均著隨時相機籌辦朝廷不爲遙  
制所陳新疆賊勢軍情瞭如指掌惟期節節掃蕩收復烏魯木齊吐魯番以次廓清南北兩路奠定西陲  
爲一勞永逸之舉後路催運糧餉軍火關繫緊要劉典當隨時籌畫以資接濟左宗棠出師塞外必須士  
飽馬騰方足以壯軍威而張捷伐各營將士踴躍前驅尤深虛念各省協解西征餉銀未能足數致有積  
欠口糧此次遠道進兵糧餉必須充裕左宗棠前議借洋款一千萬兩以備應用因耗息過多現請減借  
用四百萬兩係爲節省經費顧全大局起見惟現當大舉深入酌發欠餉豫備行糧需款甚鉅恐不足以  
資周轉該督既以肅清西路自任何惜籌備鉅款俾敷應用以竟全功加恩著於戶部庫存四成洋稅項  
下撥給銀二百萬兩並准其借用洋款五百萬兩各省應解西征協餉提前撥解三百萬兩以足一千萬  
兩之數該督得此鉅款務將新疆軍務早日蒞事迅奏膚功國家經費有常似此竭力湊撥可一而不可  
再萬不可虛糜帑項日久無功洋款如何籌借著左宗棠自行酌度奏明辦理撥用四成洋稅一百萬兩

如何解還部庫著戶部籌撥歸款所借洋款著仍遵前旨在各省應協西征新餉內分年撥還各省應解西征協餉現今提前趕解三百萬兩並著戶部酌量指提毋任延宕其餘應解西征協餉仍著各該將軍督撫懷遵前旨嚴飭各該藩司監督儘力報解毋得以八成自限左宗棠奏閩粵欠解較多請飭將本年應協甘款如數迅解等語著該督撫遵照辦理借洋款本係萬不得已之舉因西征大局所關是以允借五百萬兩俾利軍行丁日昌所陳變通西餉辦法亦有所見並先行添齊六十萬兩匯山沈葆楨處稟解具見急公嗣後應解左宗棠協餉仍著會商文煜李鶴年源源籌辦以應急需將此由六百兩諭知左宗棠劉典文煜沈葆楨李鶴年劉坤一翁同龢吳元炳裕祿劉秉璋楊昌濬丁日昌丁寶楨鮑源深李慶翱譚鍾麟王文韶張兆棟並傳諭文格李文敏知之○甲午諭丁日昌奏請將任聽書吏舞弊之道員革職查辦等語福建補用道區天明前署督糧道任內任聽書吏將應行停發兵米折價給發現銀三千五百餘兩實屬朦混區天明著暫行革職交丁日昌確切查明是否知情抑或失於覺察並將經手書吏嚴行訊究按律懲辦○黎培敬奏貴州省城添設平民待質一所明定章程懇 飭令各直省一律舉行下部議○丙申 上諭 大高殿拈香祈雨○以校勘剿平粵捻匪方略兩編事竣予出力人員太僕寺卿朱智太常寺少卿周瑞清等獎敘有差○丁酉諭本日引見之降調翰林院編修黃自元著以檢討用



○諭御史吳鴻恩奏未經擬試舉人請再先准會試等語上屆甲戌各省舉人有到京遲誤擬試者會奉

特旨准令會試後補行擬試原屬破格殊恩並諭令嗣後務當依限到京不得授以為例各該省舉人

自當先期早到何得任意遲延該御史所請本科尚有未經擬試舉人懇仍准會試後再補擬試之處著

毋庸議○戊戌諭軍機大臣等御史余上華奏畿輔內外糧價漸增請豫籌採買一摺本年近畿一帶兩

澤稀少糧價逐漸加增自應先時採買以裕民食著李鴻章體察情形並能否籌款於南省採買米石由

海運津之處酌度具奏○允沈葆楨奏獎疏銷鹽引湖北孝感縣知縣蔡炳榮以知府補用○刑部右侍

郎戴崇卒子祭葬○己亥命順天府尹吳贊成開缺以三品京堂候補督辦福建船政事宜○以毛昶

熙兼署戶部尚書賀壽慈兼署刑部尚書○諭恩齡為刑部右侍郎以烏拉喜崇阿為兵部右侍郎○庚

子諭松焜奏揀員請補戴坪一摺後戴坪員缺著以擬正之五品密率策旺邊覺爾補授○以張濬卿

為順天府府尹○辛丑祭 歷代帝王廟遣溥煦行禮○命英榮以按察使候補楊能格以道員用文碩

以五品京堂候補○丁日昌奏閩省吏治日偷牧令缺多瘠苦但求以免過為了事於民生之疾苦漠然

不關於心由是詞訟之積壓日多牢獄之犯人幾滿至雜則摺受頓閱書差則惟利是視官吏以百姓為

魚肉百姓以官吏為寇仇其黠者欲免官吏之誅求其入逃入吳端官吏熟視之而無可如何吳端因

之日熾此誠人心風俗之憂也。臣以爲欲求正本清源之計必先清理詞訟。詞訟既清則百姓不致受胥吏訛詐可遂其耕田鑿井之樂。臣現擬於署內設立清理詞訟局派選委員山稅撥局酌給薪水幫辦。稽核一面嚴飭各府州縣將所有詞訟分別上控自理作爲管收除在每月報明各守牧令每月能將案件全結者給予獎勵結數至八成以上者記功不及五成者記過如此次第辦理庶幾詞訟不致積壓牢獄犯人亦可逐漸減少矣。報聞。○壬寅 上詣 泰先殿 壽皇殿行禮。○甲辰普濟堂功德林粥廠展期兩月加賞小米二百石銀四百兩。○以周壽昌爲內閣學士。○乙巳諭前據刑部奏遵議劉坤一等奏審擬已革總兵詹啟綸主使颺斃命案一摺。適因都察院奏詹啟綸呈訴冤抑並控已革都司陳國瑞挾嫌唆使服毒陷害等情。當諭令沈葆楨嚴訊明確奏明辦理。茲據審明定擬具奏並另片奏請將陳國瑞發軍臺効力及總兵劉福興副將蕭誠均發往黑龍江當差等語。此案所放綸因與胡士禮帳目糾纏胡士禮屢向案欠詹啟綸連因胡士禮之妻胡王氏毒害其妾輒將胡士禮指使毆斃致胡士禮因傷斃命。即回湖北原籍預爲抵賴地步旋復在都察院遣抱呈控希圖諉卸竊屬罪無可追。詹啟綸著仍照原擬絞監候秋後處決。陳國瑞雖訊無唆使陷害各情惟以嚴加管束之員輒敢擅離原籍且於胡士禮命案有干預相喻情事殊屬不安。本分已革總兵劉福興於詹啟綸幫給劉文富銀兩輒思從中取利起意訛詐。

副將蕭誠於詹啟綸命案借名賄託說騙銀兩均屬罪有應得陳國瑞著改為發往黑龍江蕭誠著即革職與劉福興一併發往黑龍江當差陳國瑞劉福興蕭誠並著黑龍江將軍嚴加管束○丙午 上詣

大高殿拈香○丁未命景廉在軍機大臣上學習行走○諭本年七月十二日恭遇 慈安端裕康慶皇

太后四旬萬壽著查照成案將在京八旗官員及男婦太監等年六十以上均著恩賞該部即遵諭行○

廣西巡撫嚴樹森卒予恤如巡撫例賞其子知縣篤昌以直隸州知州用孫祖衡以主事用○命涂宗瀛

為廣西巡撫卽行迅赴新任○諭本年秋審朝審照例辦理其情實人犯著停止句決○飭廣西布政使

楊崇雅按察使長庚速赴新任○戊申諭御史袁承業奏兩澤愆期請修明政體一摺據稱近來濫捐濫

保過多內外臣工或有徇私圖便情同蔽惑請飭各衙門恪遵成法力挽頹風並下詔求言等語本年兩

澤愆期屢經設壇祈禱並降諭旨清理刑獄惟刑濫同傷天和而賞備亦非國體嗣後內外臣工務宜各

矢公忠力除奔競之風勿用調停之說勒懲濫罰符符其平朝廷政事如有闕失必當直言無隱庶幾集

思廣益國事民隱不瀕上聞以期上下交儆感召和甘毋再玩忽因循共安緘默○以崇福為湖南布政

使傳慶貽為湖南按察使○己酉命五城飯廠展期兩月○以英桂署正黃旗滿洲都統○穆圖善奏光

緒二年正月初二日准軍機大臣字寄元年十二月二十二日奉 上諭本日軍機大臣六部九卿會奏

遵議變通奉天章程等因欽此欽遵正月初三日又准著 盛京將軍崇實奏錄 寄諭兩商前來奴才  
細閱該京師條陳各節不爲無見然亦有未能盡悉者不得不縷晰陳之伏思吉林原係養兵旗地本無  
民官康熙年間以來流民漸至始陸續添設兩同知一通判及巡檢等職專理旗民交涉事件迨後開荒  
招墾官少事繁自弊叢生鞭長莫及自應及時變通增設移駐員弁力求整頓然吉林與奉天情形尙有  
不同奉天邊境尙有州縣因勢利導事猶易成吉林則民官本少若不先籌經費徒託空言於事無補此  
奴才到任後欲添官而未敢遽議之實在情形也如原奏舉辦團練保甲嚴定緝捕馬賊處分辦理賭博  
章程一片原爲化莠爲良地方安謐起見但吉林近來積弊之源亦有不同查金場荒地均係無業游民  
彼往此來迥同一氣安分者負苦以自贖不法者積聚以搶劫若非先設民官清戶口編保甲而遽議團  
練其中無可靠公正紳董稍假以權必致枝節橫生前十餘年舉辦團練恃強凌弱迭釀李玉温等巨案  
不惟無益於民轉爲民害况近日荒僻之區藉緝捕爲名肆行無忌告發到官者已復不少經奴才派員  
帶兵隨時查拿正法者已不下三百餘名適時大道暢行無阻賭博匪徒因之歛跡至緝捕賭博章程所  
屬各城按月結報辦理已久皆成具文此團練應暫緩辦賭博不必再立章程之實在情形也又原奏伯  
都訥同知移駐孤榆樹屯一節誠爲妥協且該屯已建有書院可以暫借作爲衙署較爲便捷如蒙 允

准卽請 飭部立案由奴才咨商該副都統遵照卽飭該同知卽可移駐以重職守而資治理其餘如有應行添設民官旗營之處容俟奴才酌度情形與各城副都統悉心詳查後再會同崇誠等從長籌畫奏明辦理總之設官分治地方固易求安而籌款爲難勢須格外詳慎庶可行之久遠俾免別滋弊端得旨允行○庚戌吳元炳奏查捐輸爲權宜之政例章爲務招徠全在奉行時合其宜而滿其通救弊補偏期於無妨吏治而已現行新舊例內有一條滯礙難行似須亟爲更定者一新例銀捐一條同治八年六月奏定捐章以實銀報捐新班過缺先新班過缺二項序補章程無論何項到班均先補新班過缺先三人新班過缺一人再用各項輪用班次一人以五缺爲一週歷經遵辦惟是外省請補員缺以州縣爲尤要蓋親民之官休戚相關安危所繫選擇必慎而又慎始於地方有裨自有此例必須先儘銀捐之員序補已屬礙難選擇然補缺後猶可留心體察果不勝任尙不難隨時撤參所慮者報捐時先有弊竇查外省應補簡缺知縣只有身故一項當日作爲開缺此外皆以報部准覆之日作爲開缺日期狡黠躁進之員竟可從中舞弊見出有較優簡缺應隨外補者專人航海入都在捐局覓捐作新班過缺如本省已有此項班次卽捐新班過缺先屆計部文到時正在截缺之月必應以之序補此非報捐花樣直同見缺指捐其弊漢大臣再三籌酌新章爲裕餉起見不敢違飭飭停擬請將捐免試用一項停止嗣後無論新

班遇缺先新班遇缺均以部文到省之後仍令扣足試用一年再行開補則試用期內既可令其學習補缺之日自無指捐之弊矣一舊例捐免驗看一條同治四年奏定捐例內開雲南貴州陝西甘肅廣西五省作為軍務省分准其捐免驗看現如江蘇等省既奉明作為無軍務省分所有捐免驗看一項本應飭令停止收捐惟佐雜微員捐免驗看業經辦理有年若一旦遽飭停止雖於捐輸無甚窒礙而在微員赴部驗看資斧維艱嗣後各省無論有無軍務均准其暫行捐免驗看俟軍務大定再行奏明改歸舊章辦理等語嗣陝甘辦理收捐又經前陝撫劉蓉以此項捐免驗看人員若令遠道赴陝驗看給咨往返糜費改由報捐分局詳請所在省分督撫就近驗看給咨於同治七年九月奏准咨行在案查捐免驗看原屬體恤微員第由所在捐局給咨竟可於上月報捐即於下月到省觀瞻所繫未免有弊官當各捐員既有報捐之資似不難籌此赴部之費擬請將此條亦即停止無論是否軍務省分概令報捐後赴部驗看始准到省以昭慎重下部議奏○辛亥祭 先農壇遺慶至恭代行禮○乙卯 上詣 泰先殿 壽皇殿行禮○召李鶴年入覲以文煜兼署閩浙總督○丙辰 上詣 大高殿拈香祈雨○諭文煜等奏請將彈弊使餉各員革職審辦一摺據稱同知銜黃德沛在臺灣經理營務與參將黃德桂通同舞弊有盜用關防私賣功牌使餉銀等情似此執法營私亟應從嚴懲辦副將銜參將黃德桂著即先行革職同

知黃德浦著卽斥革交文煜等嚴行查辦○丁巳諭丁日昌奏請將玩誤公事之知縣革職查辦等語嗣建福清縣知縣魏弼文在任年餘人命詞訟案件積壓甚多且有私押斃命匪報情事實屬玩泄現在並有呈控該縣丁役舞弊各情亟應嚴行懲辦魏弼文著先行革職聽候查辦○庚申岑毓英丁憂解任以文格爲雲南巡撫○辛酉 上詣 太廟行禮○以程燦爲四川布政使英榮爲山西按察使○諭穆圖善奏已革道員異常出力據實密陳等語已革甘肅西甯道舒之翰前據御史袁方城奏參有索取規禮等情經左宗棠查明屬實奉旨革職永不叙用並著穆圖善飭令該革員迅速回籍不准藉詞留營此次該革員由原籍前赴吉林穆圖善豈不知其不應留營乃竟派委差使并爲聲叙累年勞績意存乞恩實屬巧於嘗試穆圖善著交部議處仍懷遵同治十二年二月初九日諭旨飭令舒之翰迅速回籍不准遲遲

臣朱壽朋敬編

臣汪錫增恭校

夏四月癸亥諭郭嵩焘因病懇請假回籍調理一摺郭嵩焘著假一箇月調理毋庸回籍○諭步軍統領衙門奏請將疏防盜案各員議處巡視中城御史慶壽等奏坊官疏防諱盜請先行交部議處各一摺正陽門外西荷包巷永陞鞦韆於本年三月二十四日竟有賊匪由城牆下來竊去鞦韆布疋銀兩等物軍機處地豈容賊肆行抽務廢弛殊堪痛恨所有疏防之南營參將常國泰游擊趙常傑守備達保均著交部議處著副指揮楊志恆於被盜重案詳報為竊緝係規避處分著交部照例議處副指揮姬瑞麟現雖因病告假其平日緝捕不力已可概見著一併交部議處仍勒令該坊官等迅速緝獲並著步軍統領衙門查明除此次奏參各員外其值班之營汛各員及巡夜兵丁照例嚴行究辦在逃賊犯著步軍統領衙門順天府五城一體嚴拏務獲毋任遠颺賊匪登城拋擲磚塊城上值班官兵何以毫無覺察並不即時拏獲著查辦大臣據實查明從嚴參辦慶壽等另片奏請飭稽查保甲等語著內外城地方各官實力舉辦以靖盜風○王文韶奏緬甸貢使回國過境日期報聞○李鴻章奏遊一旨籌布海防迭經



籌定西洋新式後膛鎗礮分發各營督飭操練並轉託德國克鹿卜礮廠代僱德國都司李勳協來  
 津訂立合同議明三年為期教習克鹿卜後膛鎗礮該都司悉心指授礮隊操法日臻嫻熟現屆期滿銷  
 差回國由臣優給川資並商令李勳協帶同花翎游擊卞長勝等七人赴該國武學院講習水陸軍械技  
 藝俟學成回華再分撥各營教練以期漸開風氣李勳協性情忠篤與卞長勝等相習已久慨然允行業  
 與議定章程飭卞長勝等會同李勳協於三月二十一日由津附搭輪船起程竊維外交之道與自固之  
 謀相為表裏德國近年發奮為雄其軍政修明船械精利實與英俄各邦並峙臣前晤該國駐京使臣巴  
 蘭德謂中國如派人前往學習軍政船政彼國必當盡心教導是該國素敦友誼而應及時聯絡師彼長  
 技助我軍謀近年閩浙各局奏派學生赴英美等國遊歷肄業無非實事求是力圖自強起見茲臣所派  
 游擊卞長勝等久歷行陣素諳洋器更令出洋精求博覽兼有李勳協援引照料徧赴德國各廠局軍營  
 及礮臺兵船切實考究以增益其所不能似亦造就人才之一法所請出洋用費應在海防經費內核實  
 支銷其德國都司李勳協盡心教練著有成效擬請 旨賞給二等寶星佩帶回國以示優異允之○中  
 子諭刑部奏餘杭縣民婦葛畢氏毒斃木夫一案現據將該犯婦等解送到部當飭司員將各犯派役檢  
 查由沈喻氏身上搜出字帖一紙內有餘杭縣署內姜位隆懇託字樣請飭嚴拿等語著楊

位降嚴密查拿解交刑部議案將辦將此諭令知之○欽奉 慈安端裕康慶皇太后 慈禧端佑康頤  
皇太后懿旨隆福寺哲安殿宮牆外並後山上下添派官兵建蓋撥房置備器具著平鴻章飭藩司撥銀  
五千兩交馬蘭鎮總兵撥節助用○左宗棠奏刊刻 欽命幫辦陝甘軍務木質關防一顆咨送 聖典啟  
用所有陝甘總督關防應由 聖宗案隨帶西征報關○內實 上詣 大高殿 時應宮祈雨○榮全奏  
接據幫辦伊犁軍務庫爾喀喇烏蘇領隊大臣孝順等報稱該營前於同治十三年九月間在將軍溝等  
處出隊剿賊大獲全勝已將吳常出力員弁懇請隨摺獎勵其餘出力官兵應俟案保獎嗣零股賊匪  
出沒無常該官兵等皆隨時堵剿獲勝並偵探坐卡差操勤苦一年之久均屬著有微勞今擇其尤為出  
力者一併開單請獎等情前來查該領隊等所報尚屬實情自應俯如所請伏查奴才行營出力官兵曾  
於前年二月十一日分別奏咨請獎叙業蒙 恩准在案迄今又及二年辦理印務糧餉軍需各務暨  
遠探近防差赴前敵運解各項皆踴躍從事頗稱得力現在大兵雲集百城前敵撥隊分紮屯正當審  
度機宜會合進剿行營各務益增繁多該官兵等晝夜辛勤始終奮勉又有由京並烏科二城等處迎運  
軍火餉銀各員沿途小心妥速無誤均不無微勞足錄擬請彙案保獎以策將來茲謹擇尤分別繕具清  
單恭呈 御覽下部議奏○戊辰冬毓英奏官軍剿除鄧州州屬東山夷匪生擒項和等各犯提省訊明

分別按律懲辦下部知之○己巳調袁保恆爲刑部左侍郎殷兆鏞爲戶部左侍郎徐桐爲吏部右侍郎以潘祖蔭爲禮部右侍郎仍兼署刑部右侍郎以衛榮光爲浙江布政使謝膺福爲安徽按察使○庚午崇實奏奉省旗務廢弛請將佐領托克通阿等降補從之○松淮奏新得那爾喀紀略書請作木衙門交代以備後任恭閱報聞○議敘文祥寶蓋沈桂芬李鴻藻俱加一級李鴻章左宗棠俱加二級○辛未子故總兵唐殿魁建祠列入合肥祀典○壬申子浙江上虞縣烈婦趙谷氏旌表○甲戌命桂豐爲駐藏辦事大臣○子江蘇沐陽縣烈婦仰邱氏旌表○乙亥允奕梁開去差使賞給半俸○岑毓英奏修復書院山鹽隨收經費發給生童膏火又奏捐廉建屋收租以備士子進京會試旅費下部知之○崇實銘安奏據內務府署副記佐領豐年等稟稱查勘鳳凰樓下厨外面牆角裂縫各長一丈三四尺寬四五分不等地脚微有沈陷稟報前來奴才等隨恭詣鳳凰樓查勘與該員所稟相符竊查同治九年經原任將軍都興阿奏稱鳳凰樓下厨外面稍有裂縫情形不重究應預爲防範先行備辦木植嗣於同治十三年又經原任將軍都興阿等奏採辦金柱大木派員砍運到省並查鳳凰樓外面四角裂縫情形稍重尙可支持容新木風瞭再議拆換等語歷經奏明在案現據該佐領等稟報情形較前更重似難延緩奴才等恭請詳勘舉架高撐下層裂縫四柱沈陷計自同治四年經欽工修理至今十有二年恐有不虞再四思維

自應先將 聖容泰移妥協處所儼藏以昭慎重奴才等同請各宮殿查勘所有正座處所  
卽情形尤重惟查撤典閣樓房三間規模宏敞第多年停修琉璃瓦片脫落句滴不齊飛檐望板鈔朽油  
飾燦裂柱角前簷間有損折頭頂亦有滲漏若妥爲保護可期三年無虞其琉璃門隨牆一帶亦須黏補  
整齊以壯觀瞻俟保護妥協卽行奏請擇吉奉移 聖容撤藏其鳳凰樓工程俟方向相宜再請興  
修得 旨敬悉○崇實等奏查向來保護工程均派營造司照章辦理此次保護撤典閣工料較多與尋  
常保案不同若仍飭該司辦理其勘估做法購辦材料有需時日且恐節交夏末倘遇大雨時行工作難  
期堅固奴才擬揀派著圖記佐領豐年堂主事恩泰專司其事一切工料核實撥給趕緊保護以昭鄭重  
約需貳銀在四千兩以內先由盛京戶部撥給內務府發交該員趕緊辦理俟工程告竣實用之外如有  
數餘再行繳還並報京總管內務府核銷報回○文煜李鶴年丁日昌奏臺郡安平口三親身地方建造  
洋式炮台本係知府凌定國副將周振邦監督辦理所有一切工料均歸凌定國經營臣日昌先經訪聞  
凌定國有侵吞工料銀至巨萬情事卽於二月飭令臺灣道夏獻綸認真查辦並諄囑其不可含糊徇隱  
代人受過旋據夏獻綸稟復督同臺灣府周懋琦臺防同知孫壽銘前赴安平查點大小工人數目均有  
短少所給工價亦戰冊報有減凌定國撥有勇役廚子伙夫仍每日提用小工二十人洋人轎夫已在巡

洋項下開銷則又混稱在內凌定國經手領過銀十二萬九千四百餘兩內有浮開短給之項計應追銀一萬四千三百七十七兩零尙有磚瓦灰土及各項雜料並無細數呈出其中尙未知使吞若干至安平馬頭另歸周振邦管理俟核用欸舉辦等山經飭切實催追並飭呈出細數與各行店原單核算以期水落石出茲據夏獻綸函稟提集管帳謝斌等嚴訊均諉凌定國及其弟定邦經手而傳訊凌定邦又皆諉之凌定國其說前來臣等覆查洋式炮臺其屬創始苟能滴滴歸源原不能限定價值之多寡而安平爲全臺保障事關軍工要務宜如何竭力經營杜虛糜而求實際乃該員凌定國於兩年來辦理此項費工竟敢肆其侵蝕卽按照夏獻綸所稟浮冒各欸已有一萬四千餘兩之多勒限追繳一味延諉似此貪劣之員若不嚴參懲辦豈事何由起色除安平口炮臺工程已由夏獻綸委令周振邦專辦仍飭查明周振邦馬頭用欸另稟外相應請 旨將花翎副建補用道過缺卽補知府凌定國卽行革職澈訊追究倘敢延不措完另再嚴參治罪以爲貽誤軍需藉工漁利者戒得 旨凌定國著卽革職究追○丁丑 上諭

大高殿

昭顯廟祈雨

○戊寅鮑源深奏補縣訓導董廣華污穢文廟得

旨革職○己卯諭劉秉璋

奏懇請開缺終養一摺劉秉璋之母胡氏年逾八旬兼患目疾侍奉諸人皆其所委情辭懇切原應俯如所請以達孝思惟江西地方緊要劉秉璋向來實心任事於吏治民風頗爲整頓朝廷倚畀方殷且該撫

有兄弟二人可資奉養正當及時圖報用副委任劉秉璋著毋庸開缺○庚辰諭署吉林將軍寶興將軍穆圖善將永不敘用之道員派委差使並為聲敘累年勞績寶圖咎有應得穆圖善著照部議即行革職○免同治十年以前浙江民欠電課○辛巳調陞勳為鑲黃旗領侍衛內大臣伯彥訥帖為正黃旗領侍衛內大臣以奕劻為正白旗領侍衛內大臣○以載敦為鑲紅旗蒙古都統○調克蒙額為寧夏將軍○睿親王薨賞銀一千兩治喪○壬午以本格為內大臣○癸未以桂全為內閣學士○甲申豐紳托克滿奏准軍機大臣密寄遊 旨擬辦海防事宜當於是月十三日覆奏請練正兵六千名添練西丹四千名共為一萬名並請每西丹二人合給馬一匹共請馬價二萬四千兩又請款製造軍械俱蒙 俞允施行在案詞准神機營奏撥昭烏達盟巴林札薩克多羅郡王捐馬六百匹當經奴才等具咨加馬知照前去計今夏水草旺發時即可解來而各省衣撥馬價尚未到齊若拖泥待辦未免遲誤事機查屬城呼倫貝爾向係產馬之區該處亦多牧馬之家其世受國恩情殷報効者尚不乏人同治八九年間前將軍德英曾由各城勸捐車馬奏請獎勵在案茲查西丹所習步箭鳥鎗已漸可觀而待馬以演騎射尤為當務之急奴才等擬仿舊章派員先赴呼倫貝爾勸捐請給獎勵此外各城如可舉辦亦即推廣勸捐以佐軍實俟有成數益以昭烏達盟捐馬六百匹則將前請馬價二萬四千兩移充兵餉不無小補報可○豐紳

托克溫奏准部咨議覆山東撫臣丁寶楨代奏候補同知直隸州知州薛福成條陳請令東三省挑選駐防子弟優加廩餼而勦練一節又條陳內開居今日而修戎備與其以一餉養一兵而十兵無一兵之用何如以兩餉養一兵而一兵獲數兵之用近見各省整頓綠營如浙江之減兵加餉直隸河南之添餉練軍可否推行此法等語伏查黑龍江省原額兵一萬一千八十餘名內有出征三千五百餘名今實練正兵六千名添練西丹四千名補足原額蓋以旗兵世食錢糧有一額養一丁營制如此其子弟藉充甲以裕生計亦在此如綠營之減兵加餉則食餉者固樂報効而投閑者反空事若議添餉練軍與駐防子弟優加廩餼計增一倍則歲需餉二十六七萬兩即增半倍亦歲需銀十三四萬兩各省庫儲支絀歷年欠餉積至一百八十餘萬兩新章擬撥每年的餉二十七萬餘兩尚恐籌解不能應期若再議增必至有名無實而體察現在情形除西丹口糧馬乾已准支實銀外其正兵每名支給年餉二十四兩以作口糧此外並無馬乾而每兩減扣二錢六分共減扣五兩九錢五分二釐每名每年實支銀十八兩四分八釐以之應差養家本不敷用兼之馬乾亦在其中實在拮据異常且各官兵額多屯居奴才等上年奏定章程春秋進城各操六十日朝夕親演餘官令其歸屯山該旗就近訓練仍分旗調考週而復始計一月之中住城者無虛日店租及鹽米油薪並餵馬料草所費不貲操畢又有留城當差者輒見其衣不遮體

察其食不充飢馬之羸瘦史不堪言雖經奴才等逐日教導激發當場獎勵懲懼年餘以來騎射鎗箭較前漸有起色而終歲勤動演技之兵無餘力即看操之官亦無暇日欲如往年操後在屯務農兼以耕種資事畜勢有不能奴才等再四熟思減兵不可添餉不能而邊疆拮据情形又不敢不急謀補救擬請天恩俯念邊要官兵窮餒滋甚將俸餉發給銀免其減扣每年共需銀九萬一千兩除山本處地租項下動用一萬一千兩餘案報銷外可否仰懇 鴻慈飭部按年籌撥實銀八萬兩俾士馬糧芻少有所增則調劑營艱於根本重地不無小補下戶部議奏○以官占官地革輔國將軍載坤職○予故署安徽巡撫布政使賈鏞於穎州建祠○乙酉譚鍾麟奏例進皮張柿餅等貢請暫行停辦允之○丙戌予安徽懷甯縣孝女馬慶翠旌表○賜曹鴻勳等三百二十四名進士及第出身有差○李鴻章奏長蘆鹽運使林述訓詳稱蘆商正課例限五月奏銷自同治十年後因疊遭災歉節經奏准緩至十月啟徵茲以例限將屆催令各商完納據通綱商人萬盛新等稟稱該商等本重銷滯積累過深疊蒙展緩奏銷藉資補救如果辦理起色自當漸復課限無如銀價未平交項賠折加以自冬徂春天氣亢旱各處硝鹽肆起引岸銷數甚滯積鹽過多成本愈壓愈重標項難以周轉現當趕辦春運又須補交上屆正課尾欠及未完帑利已屬萬分拮据若新課同時並徵商力實不能支懇仍援案展緩該司詳加體察委係實情計自上屆奏



銷至今市及半載春運資本尙缺若僅辦太促恐致課運兩誤請照案統至十月散徵等情具詳前來臣  
查長蘆正課前因商力艱窘疊請展緩均已奉 旨允准而應撥京奉各餉仍係年內湊解清款並無貽  
誤今商力未紓勢難復舊該司係爲恤商顧課起見相應懇 天恩俯准將光緒二年正課奏銷照案  
緩至十月辦理屆時仍由 督飭運司實力催徵無誤領撥京奉各餉以期兼顧報可○丁亥左宗棠奏  
臣於二月二十一日由蘭州拜摺取行沿途整隊前進三月十三日駐軍肅州總理行營營務三品卿銜  
二品頂戴法福靈阿巴圖魯劉錦棠先率馬步全軍駐於城北記名提督新授漢中鎮總兵譚上連領所  
部先進記名提督雷夏鎮總兵譚拔萃繼之記名提督陝甘鎮總兵余虎恩又繼之四月初三日劉錦棠  
親率漢回馬步各軍禡旂啟行擬抵安西後分起以次前進蓋師過哈密行戈壁中糗糧可裹帶以趨柴  
薪草束可儲峙以待惟水泉缺乏雖多方疏濬不能供千人百騎一日之需非分起續進不可也見據譚  
上連稟已抵巴里坤譚拔萃已近哈密余虎恩已過安西臣因古城所收俄糧尙祇四批金順臧臚額來  
需糧甚急非得三百六十萬斤不能見新 臣允於巴里坤取糧百萬斤哈密取糧二百六十萬斤以供軍  
食而古城所收俄糧四批亦概付之計新糧可資接續矣惟劉錦棠馬步二十五營所備軍食本指巴哈  
存糧轉運古城茲兩處已分濟金順雖餘糧尙多而一時運腳難期周轉缺乏堪虞除前屆商駝萬隻由

安西哈密徑運百城外復由肅州儘官民商三項車輛裝糧料運百城以放儲峙幸歸化包頭寧夏商駝之運巴里坤者踴躍如常存糧尙敷轉輸劉錦棠到哈密後計百城儲峙稍充卽率各營長驅大進直搗賊巢戰事當在五月閏月之際屆時節近秋初新穀遍野有糧可恃戰而前士氣百倍與劉錦棠熟商進兵機宜以先遲後速爲穩着此也幸蘭州涼甘各屬俱霽春霖肅州安西於三月二十一二十二等日同沾優渥農祥有兆豐稔可期如天之福關內外幸獲豐年則就近採運供支勞費亦可漸闕撙節而西征大局庶幾速振矣又奏上於本年三月二十五日在肅州行營准金順咨稱統領吉江馬隊涼州副都統額爾慶額咨報本年正月閏閏白逆有糾合瑪納斯南北兩城踞回竄擾糧運之事因與督帶定營馬隊總兵馮桂增會商振武統領參將徐學功各率所部會師於大河廡相機進取瑪納斯城以期扼險防竄籌商既定額爾慶額與馮桂增卽於正月二十七日率隊先行徐學功繼之二十八日額爾慶額兩軍營抵大河廡因待徐軍未至遂於是夜先進二十九日寅刻徑薄瑪納斯北城馮桂增等改騎爲步由城西北猛登斃守城逆回二十餘名開門延納官軍城中踞賊驚起拒敵馮桂增率部巷戰額爾慶額率軍繼進鏖戰逆時斃賊三百餘名並陣斃凶悍逆目翟老四噶一兩名餘賊卻聚城東隅大色已明南城踞回見北城危急連施大礮官軍少卻南城賊馬步千餘乘勢蜂擁而至北城東隅踞賊復出死拒馮桂增縱橫馳

突身自數創額爾慶額亦奮身抵敵背足受傷俱襄創力戰馮桂增復受傷墜馬賊眾猛撲昇擁入城額爾慶額憤極陷陣斃賊十餘名因弁勇傷亡已多勢不能支遂卽收隊回防徐學功於是日行距瑪納斯城十餘里地方見事已敗亦卽撤回額軍陣亡官兵共計五十五名馮桂增所部暫飭都司馮以利接帶整理又據徐學功報戰事失利略同惟所稱未進之先額爾慶額等與徐學功原議於正月二十九日由大河廠會師進取議定後額爾慶額馮桂增兩軍前期進取徐軍屆期進發行距瑪納斯城十餘里地方遇兵勇紛退額爾慶額帶傷回防徐學功率所部前救護敗殘兵勇收隊回營沿途探聞額軍官兵約陣亡三十餘員名馮軍弁勇約陣亡一百六七十名額爾慶額挑帶駐防沙灣土勇約陣亡十餘名金順以徐學功救援不力先摘其翎頂額爾慶額進志過銳亦未便免議等因咨核奏前來續接額爾慶額緘順深以徐學功進兵遲緩爲言並稱前報陣亡官兵五十五員名內有披甲金有一名逃回實共陣亡五十四名其馮軍陣亡弁勇據營員稟報共計一百九十一名與徐學功所報兩軍陣亡人數亦有未符且維幾攻堅城本難得手而馬隊黑夜撲城尤爲希見之事額爾慶額馮桂增久歷行間不應冒昧至此致挫之由實因輕進貪功咎由自取徐學功行近瑪納斯地方知前敵已敗不卽麾軍馳援雖屬無可辭咎惟據彼此牘報情形而言額爾慶額馮桂增原約二十九日進攻並未明定時刻嗣兩營於先夕寅刻

磨馬隊前進自非徐學功所能預知且額爾慶額於毀攻瑪納斯城賊果事前並未咨商金順事後緘閉避至兩月始抵肅州不但馮桂增存亡未悉卽所部金有一名收後逃回當時亦未及詳關外事務文報多不足憑且未敢輕率請旨見飭總理行營營務道員劉錦棠逐細查明具覆再會金順據實馳報以昭核實又奏三月十三日馳抵肅州後十六日准兵部遞到軍機大臣字寄光緒二年三月初一日奉

上諭左宗棠出師塞外必須士飽馬騰方足以壯軍威而張撻伐各營將士踴躍前驅尤深慮念各省協解西征餉銀未能足數致有積欠口糧此次遠道進兵糧餉必須充裕左宗棠前議借洋欸一千萬兩因耗慮過多見請減借用四百萬兩係爲節省經費顧全大局起見惟見當大舉深入酌發欠餉豫備行糧需欸甚鉅恐不足以資周轉加恩著於戶部庫存四成洋稅項下撥給銀二百萬兩並准其借用洋欸五百萬兩各省應解西征協餉提前撥解三百萬兩已足一千萬兩之數洋欸如何籌借著左宗棠自行酌度奏明辦理欽此三月二十五日欽奉 寄諭部撥四成洋稅銀二百萬兩見擬分作四批由順天府接續領解交西征糧臺分收轉解左宗棠軍營此項庫欸該部請於西征協餉除提前之三百萬兩及兩次所借洋欸酌還本利各銀若干外所餘本屬不多若令儘數解還部庫恐於該大臣軍營餉需仍屬不敷周轉著改於去歲議撥南北洋海防經費之四成洋稅內按年酌提一半將此次部撥二百萬兩陸續扣

還所借洋款著左宗棠詳細核定各省協餉內某年某省應還借款若干分晰具奏各該將軍督撫即將該省協餉解過西征糧臺及歸還借款本利銀兩各數目隨時咨報戶部查核倘不能解至八成以上仍著該部嚴參懲辦欽此跪誦再四感激涕零不能自已伏維出塞之師實緣局勢所在不得不然迥非黷武窮兵侈言遠略可比 聖明洞燭邊方久遠情形 軫念征軍積年苦況 特發德音允撥部存巨款 慈諭各營將士踴躍前驅尤深厚念而慮微 減借洋款難資周轉 允借洋款五百萬兩令臣自行酌度辦理 慈懷之曲體邊關將卒無微不至如此何以復加又慮部議各省提前協解三百萬兩外儘數解還庫款於臣軍餉需難資周轉 飭改於海防經費四成洋稅內按年扣還紓應協各省之力不強以難應邊遠受餉之軍不限以數 天恩高厚 聖慮精詳非但時局之幸 臣軍之幸 卽各省督撫關諸臣亦無不感幸同深 臣於欽奉 恩旨後次日大發諸軍宣示 朝廷德意令諸將校傳諭士卒歡聲雷動歎稱誓當竭力圖報有口同聲 臣請諸統將從前發四箇月鹽菜馬乾銀兩尙餘若干則僅有存者比以俄糧遲到先挪此項糧價銀十二萬五千兩分給裹帶均欣然喜出望外諱拔萃余虎恩劉錦棠率各起馬步出關時 臣於餞送後遣人覘之還報士飽馬騰整列齊行無落後者觀士氣之可用知 皇仁之入人者深 臣之請借洋款也原因協餉積欠太鉅頓催尙應計無復之而舉債用兵本泰西各國之常不

足爲異借本愈多則期限愈速取息愈薄尤於時局相宜所以擬定千萬者計得此大宗見餉除撥還歷  
年本息外協款尚多盈餘庶一意經營事之應辦者及時舉辦尙冀得所措手以濬利源非倖恃此款爲  
一歲計也所以必商之兩江者上海爲中外商銀洋匯萃之所商借洋款恆必由之而現任督臣原有  
借定未用之款重理籌說息耗不至頓增茲既窒礙不行復奉 諭准借五百萬兩自行酌度敢不切實  
圖維以期周妥竊計本年應得的餉除部款二百萬兩協款提前三百萬兩外各省尙有應解八成以上  
餘銀以之清還陝鄂滬新借各款尙可存留四百數十萬兩計連閏十箇月內餉需得資周轉是本年不  
借洋款尙無不可惟此後各省關協款衰旺未可預知而懸車深入道遠費繁若無實餉接濟不堪設想  
近接上海轉運局道員胡光墉等稟稱上年花旗英德士兩國在海島開礦獲銀甚旺若與商借可期有  
成臣答以現奉 恩諭西征餉事目前尙資接濟如可由陝甘總督衙門出給印票無須借重兩江海關  
固爲簡捷苟必須海關出給印票則浙粵或容商最惟借款不許向英商議及卽滙案連結亦不復向其  
商借並須預爲說明彼此成借不更關白英人惟借少則期近息重恐未能如臺防十年八釐之輕耳臣  
之擬待來年始行議借者一則還借一年可省一年息耗一則明年議借隔年始還一期兩次彼時臣前  
借之三百萬兩本息已悉數還清界限分明各省關協餉從後年撥還借款亦不至稍形迫促屆時臣當

詳細指撥再候 飭部議復施行至陝甘諠均一體甘餉苦細情形撫臣久已深悉詎鍾麟政奉 諭旨垂詢江蘇月協陝西一萬兩能否撥歸西征卽飛緘抵 臣無論陝省如何爲難必當先其所急 臣已緘復卽由撫 臣會銜具奏免致上煩 宸廑 諭軍機大臣左宗棠奏馳抵肅州資遣馬步各軍分起出關額爾慶額等軍輕進失利現擬緩借洋欸各摺片覽奏均悉劉錦棠等軍現已分起前進據稱該員到哈密後計古城儲峙稍充卽率各營直搗賊巢現在士氣方新軍聲丕振左宗棠當會同金順督飭將士乘其銳氣鼓行而西於穩慎之中寓奮迅之意殄除巨逆用奏膚功朝廷實有厚望焉額爾慶額等與攻瑪納斯城輕進失利馮桂增被賊擁入城中著左宗棠查明詳細情形據實具奏左宗棠以本年餉需尙資周轉現擬緩借洋欸著該大臣隨時酌度辦理前據額勒和布托倫布等先後奏報逆匪窺擾沙紮蓋等處現在大軍出關該逆鋌而走險窺伺北路自在意中烏科等城境內未有重兵空虛可慮倘被其窺擾則勢成燎原聚殲不易著該大臣等據派勁旅於北路地方擇要扼紮以杜紛竄將此由六百里各諭令知之○左宗棠奏分統獨軍提督徐占彪丁憂留營報聞○戊子松淮奏廓爾喀請示貢期伏查定例廓爾喀國王每屆五年表貢一次同治十一年例貢會奉 旨免進扣至光緒三年係屆五年例貢之期前因奉 旨著於二十七個月後再行呈進計於明年五月屆期是否准其按期呈進抑或暫緩之處伏

候 訓示遵行又據該國王稟稱生有長孫其稟來藏奴才亦即回檄構買並寄去 恩賞蟒緞二卷奴才外加大緞一卷作為賞賚以副 朝廷懷柔遠人有加無已之至意得 旨著按期呈進○己丑文煜李鶴年丁日昌奏德國安納船主並大伙二人在洋被殺先經通商局接到代理領事戴爾佛照會當即派員會商該領事駕坐官輪船馳赴閩安福寧一帶洋面適廈門領事官亦派兵船駛至訪查係被水手華民楊細細等謀害由局懸賞飭拿據閩縣長樂等縣拿獲楊細細翁正梅湯起信三犯並先據廈浦縣漁民施德武等繳出楊細細寄頓糖貨山縣解省飭發福州府審辦臣日昌復派輪船委道員陳維漢等周歷各洋督率營縣追緝茲據追起失賊解局並據臬司張岳齡督同福州府知府林慶坤提犯審擬聲明此案供證確鑿該犯楊細細實在刁健堅不承招會同通商局司道具詳解勘前來臣等隨親提研詢翁正梅等皆供無異惟楊細細僅認幫同棄尸於起意謀殺洋人並下手將大伙殺斃獨自主意搬運糖貨各情堅不供認查該犯係水手頭眾水手皆聽其指揮如無起意謀殺何肯幫同棄尸且據翁正梅等當堂指實奴供係該犯起意謀命下手殺人具有稟結該犯不能指摘翁正梅等一語即寄頓糖貨租賃山寮之施德武等指證確鑿該犯亦無詞可辨但稱當時風大船危恐致沈溺是以暫搬寄頓係有心狡賴冀圖宕延案既眾供確鑿應即擬結此案楊細細除棄尸輕罪不議外合依已行得財律擬斬立



決該犯遺意謀殺二命應加擬梟示以昭炯戒仍照例請 旨定奪翁正梅商同謀害復下手殺斃大伙亦屬不法合依謀殺人從而加功者絞監候律擬絞監候秋後處決楊起信於楊細細等謀殺洋人訊未同謀下手惟當時知情不阻追走脫後又不首告案關謀害洋人二命應照謀殺人從而加功杖一百流三千里律上減一等擬杖一百徒三年定地解配折責充徒施德武施大灼租給楊細細山寮寄頓貨物行戶蔣上灶收買冰糖並不確查來歷率行租給收買均有不合應與擄拾斷梳之李阿達各照不應重律擬杖八十折責發落卓立陳阿猪當時不知謀殺事後卽行首告應免置議羅湖汎千總林遇春據領事照會內稱該弁有得賄情事業經咨革應飭嚴審另辦逸犯陳阿珀等現經懸立重賞分飭勸緝獲日另結已起各賊均交領事點收口棄海中無從擄獲亦毋庸議失察各文武俟查明失事洋面界址另行核參拿犯出力各員亦俟另行核辦俾示勸懲下 旨刑部速議具奏○庚寅李鶴年奏遣撤李承光駐閩各軍報聞○是月日本國使臣森有禮回國書記官鄭永甯署理

五月辛卯朔慶愛奏由兵部火牌遞到光緒二年二月二十八日欽奉 上諭嚴樹森奏田州土族滋事派軍勦捕一摺匪黨岑瀾青等尙分踞楞莊江州哨瓦等村著督飭署總兵遠三趕緊搜捕務將此次倡亂匪徒按名弋獲等因欽此欽奉之下伏查餘匪自敗退楞莊江州哨瓦等處後節經嚴飭百色羅文武

會督各營跟蹤追剿上年十二月內總兵陸純剛督率勇練奮力攻入楞莊岑瀚青率黨十餘人由後欄竄逃把總張雲素識該匪因督隊緊追逼入深林當獲匪黨岑裕壇並悍賊梁興作卓亞祐及餘匪數人副將黃才貴遊擊姚大瑛各率營勇圍搜江州村匪首匪岑子安等先已在逃僅獲其僞軍師陸異名並餘匪十餘名殺斃悍匪多名立將該村柵圍全行焚燬維時同里積匪蒙明昌之子蒙亞八綽號蒙大王由龍篆里帶百餘人出擾江州經遊擊蕭榮升留防哨勇出其不意截拿於竹好村獲匪甚眾蒙亞八登時爲哨長李廷紀所擒蒙明昌聞之竟敢於次日率黨出橋頭攔截適與委員陳子廉等所帶團練相遇內有認識蒙明昌者因分道夾擊匪黨敗走蒙明昌亦遂就縛署百色同知楊廷璣以該匪父子及岑瀚青岑裕壇梁興作卓亞祐陸異名等均係首要逆犯飭令分別提解研訊確供就地嚴辦遠近商民莫不稱快其平馬一帶被擾地方飭彈壓委員桂平縣知縣袁寶錄妥爲撫循並飭黃才貴分撥哨隊擇要駐防迭據派出千總鄧瑞麟拿獲江州村要匪劉亞一名千總劉鳳等購獲逆匪黃卜高一名委員李鳳崗等密在八角山拿獲逆目鄂鴻寬黃仕中二名均分別押候懲辦至陽萬土州判印信先於上年十二月底拿獲岑潤青案案供稱先經攜往楞莊後交其族人岑鈞收藏比查岑鈞人尙安分先已避往雲南土富州一帶隨設法傳到勒限繳印至本年正月始據將陽萬土州判印信呈繳到廳經楊廷璣驗明封存

時因陽蕩無官民情惶惑楊廷璣先已派委候補州判李鳳翔馳往彈壓刻給木質鈐記一顆至是乃另刻木記發給岑鈐隨同協理暫安反側再行另議處置等情由楊廷璣稟報前來查楊廷璣所稟此次謀反田州族目皆悉聽岑瀚青指揮實係要犯其蒙明昌父子尤爲稔惡多年久經懸賞未獲今經各營同時擒解並獲匪黨多人懇辦搜捕尙屬認真惟岑子安仍舊在逃亟應加緊緝拿以除後患前次派去東字光字坤字等營業山巖樹森札飭道撤現經另調常勝前新勝甲等營去填紮協同原派之福字永站等營認真辦理並欽遵昨奉 諭旨轉行署右江鎮總兵達三等督飭派出各營加緊搜捕妥籌善後以綏邊要而慰 宸廑又奏粵省軍需總局改爲善後總局均報聞○壬辰 上詣 大高殿 凝和廟祈雨○甲午以鍾佩賢爲內閣學士○乙未大學士文祥卒 賜祭葬入祀賢良祠○文格奏副將胡定清之母龐氏百歲請 旨旌表下禮部議奏○庚子諭刑部奏承審浙江民婦葛華氏再斃木夫一案尙有應提人證請飭提解等語飭卽派員提解毋任一名潛匿○修禹陵○辛丑景瑞奏伏查 暫安殿宮牆迤後山勢崇高獨峯特起與迤近各山均不相連 宮牆附近雖設有旗綠各營官兵堆撥尙覺人數較少照料雖屬自應遵照原奏循繞後山一帶添派綠營官兵分段守護另派官兵時赴山上巡邏以昭嚴密奴才前曾加派馬關鎮左右營蘇州營黃花山汛弁兵三十三員名專在山下巡行稽察另派官弁四

以兵丁五十名撥赴山後循繞守護合之原派旗綠各項官兵共有二百餘員名足資守衛現在加派官兵應行建築堆撥奴才親歷察看地勢擬在宮牆左右並西峯口外添建撥房三座計十五間作為巡山官兵承值之所又自西峯口圍牆進內循繞後山之麓向北折西轉東至宮牆西向計共十二里有奇擬添建堆撥十座共房二十三間作為巡守官兵值班之所此項房間現已擇吉開工建築並添置盛水器具暨掃帚竹筴鐵鈎鐮刀等件分交各堆撥隨時將山坡上下積草芟除又查宮牆進後山上前曾開修火道現已復加開寬將積年草根一律剷除悉露土石並用碎石壘為知垣以便巡守計此段火道均寬三十丈東起西峯口循山梁至山頂向西南旋繞宮庭進西直達山下通長十里有奇即令巡守官兵不時登山循行瞭望如生新草遂段剷除所有派出巡守官兵奴才與中軍遊擊左右營守備輪流周查倘有疏懈空誤即行嚴參重懲以期整肅至於現請經費銀五千兩除建築撥房添置器具開修火道核實撥節動用外尚有餘存請將加派巡山守護弁兵八十七員名按照前次部議常用守護官兵應支口分數目無論弁兵每名日給銀一錢以資津貼仍饒總造冊咨報藩司分晰核銷俟將此款用竣時奏明續行請領俾供應用再查後寶山上下應添巡邏官兵另由內務府緣撥按段加派原設內火道應行加寬之處已飭該營汛分別開修報聞○癸卯 上詣 大高殿 時應宮祈雨○甲辰予故總兵邱聯恩建

刑列入同安祀典○左宗棠奏遵查保獎出力前藏員使下所司議奏○李鴻章奏准軍調駐陝西等省  
軍需前截至同治十一年十二月底止業經列爲第二案報銷於光緒元年七月二十八日具奏奉 旨  
該部知道單併發欽此湖查同治十三年六月以日本使擾臺灣欽奉 諭籌派援軍飛飭唐定奎統  
帶步隊十三營由徐拔赴瓜州雇備輪船航海赴臺聽候沈葆楨調遣該軍所需月餉軍裝子藥等項仍  
由淮軍後路臺局源源轉運籌濟並以甘肅清陝防已鬆請調記名臬司劉成藻統率武毅銘軍馬步  
二十二營拔赴山東濟甯及江南徐州一帶擇要駐紮以備南北海防策應當經奏奉 諭旨欽遵在案  
茲查此次接造淮軍調駐陝西直隸江蘇湖北等省軍需用款除提督吳長慶統帶慶字親兵八營提督  
劉玉龍開花礮隊一營仍循舊撥歸江蘇留防軍需案內彙銷此外自同治十二年正月月起銘春水師二  
營已照淮揚水師章程由十三年六月起改減支給現截至是年五月底止湖北提督李長樂統帶武毅  
馬步七營十三年正月起奏明撥歸湖北省支發其由淮軍糧臺放過餉項現截至十二年底止又臬司  
劉成藻奉 旨由津赴陝接辦軍務添募隨帶哨隊及調回濟防後酌量裁撤營哨所支餉雜各款自十  
一年十月起截至十三年七八月先後止統歸此案彙册請銷其餘水陸各營一律截至十三年六月底  
止列爲第三案俾清界限以上營哨官弁員名勇夫總數在防處所先經造册分咨軍機處戶兵二部備

查至馬步水師各營薪費口糧正雜等項概循前案仍照楚軍刊本營制並奏定章程准銷成案接續造報其柴草油燭折價卽照部咨十三年三月底截止以後仍遵奏奉諭旨允准援例量給柴薪本色數目彙歸次案分晰造銷又馬隊各營倒補馬匹係照駐紮省分營驛例價核給採辦製造軍裝器械工價並水陸轉運雇用船車驟頭夫役價腳分別餉械軍火斤重程途里數悉照軍需例案及歷屆准銷數目核實支發飭將截至十三年六月底先後止收支細數趕緊分晰造報今據報銷局司道等詳稱舊管項下上屆截至同治十一年十二月底止實存銀三十五萬三千九百三十六兩七錢有奇新收項下總計浙江四川兩省協餉並提撥湖北江蘇藩關鹽局車餉兩淮鹽釐及本案扣存平餘等項共銀五百五十四萬二千三百三十一兩三錢有奇以上管收二項共銀五百八十九萬六千二百六十八兩有奇內除天津工程局用款及提督唐定奎統帶各營渡臺雇用上海招商局輪船價腳共銀二萬九千八十七兩七錢有奇又前列專冊請銷補放淮軍馬步水師各營同治十一年底以前欠餉銀二十七萬一千二百一十一兩六錢有奇又本案附請奏銷洋鎗廠隊教習辛工並行營修製洋軍械局購買外洋軍火工價等項兩冊共銀二十九萬五千六十三兩三錢有奇計一年零六箇月實收用銀五百三十萬九百五兩三錢有奇開除正雜各款遵照部議酌定軍需報銷章程各歸各部核銷計應歸戶部核銷銀四百四

十九萬八千一百六十二兩五錢有奇應歸兵部核銷銀一十四萬二千九百八十七兩三錢有奇應歸工部核銷銀一十八萬四千六百六兩一錢有奇統共請銷銀四百八十二萬五千七百五十七兩有奇實存銀四十七萬五千一百四十八兩二錢有奇已接文同治十三年七月起正雜餉項並定購外洋鐵火子彈價值等用歸於後案舊管項下滾接分晰造報等情具詳請奏前來臣查淮軍分防數省此次造報馬步水師各營勇丁遵照部咨開報花名清册正雜款項概發湘平折實庫平報銷仍扣雜款一分不餘均係循照歷辦成案實用實銷並無絲毫浮冒下部知之○乙巳諭近畿一帶天時亢旱直隸山東兩省暨豫省河北等府亦復雨澤愆期被旱地方較加糧價日增民食艱難閭閻不免苦累著順天府尹直隸總督山東河南巡撫體察各該地方情形加意撫卹毋令流離失所並講求救荒之策督飭所屬實力舉行用副朝廷軫念民依至本年天氣過旱尤恐蝻蝻萌生貽害農田損傷秋稼於民生大有關係著該府尹督撫嚴飭各屬先期查勘認真掘挖搜捕務須一律淨盡毋留餘孽○丙午劉坤一奏廣西軍務肅清該省營制仍歸總督主政下兵部知之○戊申以馮譽煥為內閣學士○論文煜丁日昌奏特參文武各員請旨分別革職正法一摺提督銜總兵朱名登以專闕大員委帶營勇竟敢曠缺不補並於游擊郭珍明等剋扣勇糧等情始終袒護實屬荒謬糊塗游擊郭珍明都司何植祖從九品郭秉義通同

魁相勇糧殊屬實劣朱名孫何積祖郭秉義著一併革職朱名孫郭秉義並著永不敘用不准投効各路軍營郭珍明何積祖以幫帶哨官輒敢販運洋藥賣與勇丁吸食希圖漁利敗壞營規實堪痛恨均著於軍前正法以昭炯戒○周聲樹奏鹽課以兩淮爲大宗淮南課額楚岸最多軍興以來江淮道梗前湖北湖南借運川鹽本係權宜之計金陵克復前兩江督臣曾國藩重整淮綱時楚岸被川私久佔因議重抽川稅以暢淮銷同治七年九月曾國藩奏禁川私入楚經部議准乃鄂省官吏利銷川鹽遂致川私充斥九年三月曾國藩奏楚省引地被川鹽侵佔太甚一摺內稱川私侵楚以鄰稅收數計之自七年分逐漸加增照淮南大白斤一引計算每年佔銷不下二十萬引而繞越夾帶偷稅之私不在此數湖北九年分僅銷淮鹽七萬餘引比前銷不過三分之一湖廣督臣李瀚章外間頗識其租護川鹽膜視淮鹽今欲楚岸鹽綱之平允但在楚督一心之轉移且餉項之贏絀絕不敢爭今欲鄂省減去川鹽入款願將兩江應得鹽銀全數歸鄂每銷淮鹽一引鄂省可入銀一兩三錢有奇較之鄂章銷川鹽六百斤僅收川鹽十千尙屬淮勝於川鄂例有贏無絀應無難辦之處其言可謂痛切矣乃既不允從反徑札湖南督銷局將衡州等處之緝私巡船概令裁撤曾國藩批局詳云湘鄂兩省本係淮南引地暫准川鹽完稅行銷已屬權宜至繞越偷漏以多報少之川私不特准引大受侵害並有礙於楚例鄰省大吏皆有疏銷淮鹽之責



方冀督飭淮局委員嚴緝鄰私私違則官自饒而餉自裕乃欲該局稟准設立之巡船率聽川販一面之詞特札禁止是鄂中祖川之見惟恐川販不繞越不偷漏從此川私橫行幾不許淮局委員過問於理既爲不順且經江督批准之件楚督竟無文牘咨商徑札止之於情亦屬不安仰仍照常緝拿不得因鄂省租護川私稍涉疑畏並候咨明鄂省嗣後川淮交涉事件應先咨商辦理以符體制等語舉此一端而鄂省租川之情形可觀矣自有此舉委員不敢緝私巡船竟同虛設不得已於是年八月奏請暫行分界銷售以湖北之安陸荊州襄陽鄖陽宜昌荊門五府一州湖南之澧州一屬借銷川鹽部雖議准仍聲明川鹽因黔邊不靖無本岸可銷暫照所議一俟黔邊肅清即將川鹽借銷各屬全行退出歸還淮地毋許再有侵佔以肅綱綱並請行鹽定界乃 我朝二百餘年之大經大法卽時勢所迫暫予變通久必復歸舊制此正論也先是川鹽鄰稅每斤抽錢八文以五文歸淮三文歸湘李瀚章忽減作五文以三文歸淮二文歸湘湘省以爲數太微咨復全減每斤只抽三文矣又稱川鹽成本較重將湖北所收陸課奏請停收又請將湖南澧州花畹岡稅局裁免經部議駁又頂奏部仍議駁且謂其陳奏未會江督之衝徒示體恤於川販未極利害於淮綱顧川而不顧淮未免太偏並聲明川淮分銷楚界本屬暫時之計未便喧賓奪主是引地不容久假部議已再四聲明無如意見所持屬更望風疑畏川島日益橫行同治十三年二月

初五日膽敢聚眾持械將岳州府境之鴨欄磯緝私卡局焚搶一空殺傷巡船水勇督軍獨將文武卡員奏參而滋事首要各犯則未拿辦一人旋經刑部咨查亦竟置之不覆嗣復由湖南撥勇戍守而委員不特不緝川私反力爲護送致湖北沔陽州之潘家嶺等處又有毀勇毀卡之事地方官不敢過問且有不應緝之說督臣又札行湖南督銷局許川私假道常德辰沅以達貴州沿途酒賈聽其所爲湖南借銷名雖避州一屬而南連常德東接岳州旁及鄂省州縣川私路路可通湖北名雖荆襄安鄂荆五府一州而樊岸分銷局既被擠撤川私直達沔陽州境乃嘉補崇通通山各屬委員懼遭牽撤莫可詎何川販結黨橫行非僅偷漏而已此近來川強淮弱之實在情形也鄂督祖川之意大約因川販太多禁之則恐失業之民因而滋事不知川鹽自有引地前因黔邊未靖無本岸可銷故作權宜之計今全黔肅清川鹽引地既復販徒亦有所歸豈容復佔淮地且自軍興後淮引久懸場鹽積至百餘萬引各岸積至數十萬引場鹽之困由於滯銷滯銷之源由於私佔倘場商力竭瀕海七八百里隨丁夫役船戶數十萬人無可謀生獨不慮其滋事乎或以鄂餉爲詞查同治十年戶部奏稱鄂省必欲行銷川鹽原爲籌餉起見乃近年鄂省所報川釐數目遠不及淮課之多是淮銷之短絀既見川釐之挹注無期徒使祖宗成法因此敗壞應飭江鄂兩省悉力妥議力圖規復等語是川鹽無益於鄂餉也川鹽取巧舞弊每包四百斤或數十

斤不定散裝船底無數可稽獨准鹽之進出悉憑官局按引扣稅不爽分毫者孰多孰少相去天淵乃必取少棄多故違定制公忠體國當如此耶今且不與論意見之是非而先論國計之損益從前鹽務積弊其利上不歸官下不歸民而盡歸中飽自前兩江督臣陶澍改用票法稅課倍增國藩推行於淮南自改章至出缺之日止兩淮已收過課釐一千七百萬兩今則益多此明效也以五百引一票計之多銷一票釐課可得三千兩場地錢糧三百餘兩倘能盡杜鄰私則兩湖七十七萬之引額不難復舊即如湖南之平江向食鹹鹽自爲一岸以私鹽之不能行每年銷至萬引在湘岸內獨早運三綱此非私淨則官暢之明喻乎使楚省全岸能早銷一綱即可入銀一百六七十萬兩捨此不圖坐令應入之巨款付之東流賈可惜也此引地必應急復之實在情形也相應請 旨飭部妥議並飭下兩江督臣沈葆楨著湖廣督臣翁同龢查照部議原案收回湖北荆襄等府州及湖南澧州一屬歸還原地於湖北平善場地方遴員設卡認真巡緝則川私斷難偷越釐課可以立增矣下戶部議奏○己酉王文韶奏湖南糧價昂貴請嗣後販運穀米雜糧凡在湖南境內售賣者無論水陸釐卡一律免收釐金報關○甲寅 上諭 大高殿昭顯廟祈雨○李慶翱奏祥符縣紳士馮端本捐穀備荒請 旨給獎下戶部議○乙卯諭軍機大臣等本日據恭親王寶璣沈桂芬面奏英國馬嘉理被戕一案曾經該王大臣與英使威妥瑪辨論該使借

此一事多方要求具有尙可通融者業經酌量允准有礙難准行者當經駁斥該使未遂所求遽於昨日  
出京等語此案經總理各國事務衙門王大臣與威妥瑪反復辨論力持大體今該使遽行出京自是意  
存要挾如該使行抵天津往見李鴻章議及此事該督即可相機開導就近商辦如該使到津後復欲南  
行該督亦須與之互商冀可早了此案不至遷延本日寄去諭旨一道如該使察看愚據著另行恭錄給  
予閱看俟事竣後仍繳還軍機處備查至應議條款業經總理衙門陸續知照諒必能妥籌辦理將此諭  
令知之○崇實等奏奉省當此變通章程之始建置總督轅門修葺首道衙署並擬添設中軍副將守衛  
兵房以及招募書役添雇人夫等事既須次第舉行不免逐項需款即使因陋就簡粗具規模所費亦屬  
不少況此外尙有別項用費奉省實無閑款可備雜支惟查有山海關常稅盈餘一項上年經奴才等奏  
蒙 恩准作為留支口分現已停止本年復經廷臣議准新章即於盈餘項下提撥督撫學政查廉共銀  
一萬六千兩核計此項每年尙有餘廣又查有該關招商船稅一項每年所入亦不過數千金合無仰懇  
天恩准將以上兩款無論多少儘數提解奉省以備變通章程以後一切雜支庶免時虞竭蹶如蒙  
俞允當由 奴才酌量緩急撙節動用統俟事竣再行奏明核實報銷卜部議奏○丙辰欽奉 慈安端裕  
康慶皇太后 慈禧端佑康頤皇太后懿旨御史潘敦儀奏請開除親王差使一摺前因醇親王奏得疾

復發懇賜矜全當允王公大學士六部九卿之議將醇親王所管各項差使開除卽神機營事務亦改派伯彥訥謨祐等管理僅令醇親王隨時會商籌辦惟營陀峪工程重大仍令前往照料亦該親王職分所當爲嗣因皇帝入學禮部特派照料毓慶宮事宜亦非尋常差使可比至每年七月十月萬壽及元旦令節均令詣壽康宮行禮毋庸隨班慶賀並加恩以親王世襲罔替所以體恤而優崇者原與諸王廷臣迥別該御史於朝廷用意未能深悉持論致多失當所奏著毋庸議另片奏請表揚毅皇后以光潛德等語覽奏深堪詫異本朝恭上列后說號均係恪遵成憲謹敬舉行孝哲毅皇后已加諡號豈可輕議更張該御史逞其臆見率行奏請已屬糊塗並敢以傳聞無據之辭登諸奏牘尤爲謬妄潘敦儀著交部嚴加議處○諭御史李桂林奏請整頓熱河兵米一摺據稱熱河兵米向係地方官籌撥或由本地採買現有竊吏把持包攬將各商民從前例應免交者濫行徵收並於隘卡詐索實爲地方之害等語事關兵食若如所奏情形亟應認真整頓著瑞聯確切查明從嚴懲辦該處隘卡應如何裁併之處並著奏明辦理○已宋崇實奏開用總督奏天關防報聞○庚申夏至大祀 地於 方澤遺奕圖恭代行禮○崇實慶裕奏奴才崇實上年遵 旨變通吏治當因奏省少一承上啟下之員擬將治中請加銜兼行首道事務並管凶省驛站嗣經廷臣會議奏請裁撤治中改爲驛巡道奉 旨允准欽遵在案奴才等伏查改設專員

既可藉資表率亦更有所責成一切事宜自更較爲妥協惟治中本係五品京職奉省向章例充學政提調官所有奉天府屬與考文武各軍均由治中錄送學政考試其公所中建有考棚駐紮城外今改設驛巡道既係監司大員自未便令其仍辦學政提調等事奴才等再三商酌奉天理事通判一員原爲管理旗民交涉案件而設現在各屬州縣既經加有理事同知銜此缺即可裁撤改爲軍糧同知據山正途出身人員補用以便專辦考試其通判所管各務即歸該同知管理庶於變通之中更可各符體制惟於通判衙署另蓋考棚未免又需糜費擬卽彼此互換以治中公所作爲同知衙署卽將通判衙署量爲展拓修葺以爲首道衙署似此一轉移間實屬兩相合宜所有用費當由奴才等再行籌款奏明核實辦理至該道養廉一節查熱河道養廉每年只二千金山東要缺各道則有多至四千兩者此次改設道員事同創始既無別項入款足資養贖而兼管通省驛站審轉奉天府屬刑名並治中向管各務除考試一層歸新設同知辦理其餘諸事仍由該道專辦政務展繁計非實銀三千兩不足以敷辦公雖較之熱河不無加增而比之山東尙爲減少酌中定議與例亦屬相符現在員缺既蒙簡調有人不日卽可到省合無仰懇 天恩俯念奉天根本重地該道職任繁難飭 部照准庶實事求是稍免竭蹶之虞並請 諭令吏禮二部卽將該道關防暨擬改之軍糧同知關防趕緊鑄造頒發來奉以資辦公而免贖誤至新設道員

同知衙門應募書役及人夫工食等項奴才等擬仿照熱河章程酌量隨時辦理得 旨如所請行○諭  
瑞聯奏特參阻撓重案之盟長請 旨嚴議一摺阿魯科爾沁旗協理等捏欠拾印一案經瑞聯委員將  
協理綽伊扎布等傳訊放漢貝子旗梅倫富凌阿輒敢攔阻並途遇該旗護衛賽上阿帶領多人竟將綽  
伊扎布等六名搶去據稱伊泰盟長差派不許綽伊扎布赴案顯係該盟長主使肆意阻撓放漢貝子達  
克沁滿先行交理藩院嚴加議處並勒限嚴飭將綽伊扎布等並富凌阿賽上阿一併押解前赴熱河交  
瑞聯訊辦○是月法蘭西國使臣羅淑亞回國參贊赫捷德署理

閏五月辛酉朔子浙江山陰縣貞女周潘氏直隸聚強縣貞女段盧氏旌表○李鴻章奏上年福星輪船  
失事遇難江蘇員董嗣光烈等天津專祠落成請以愍忠二字為額敕部立案報聞○壬戌先是五月間  
御史張盛藻李廷燾奏稱同治年間曾因直隸被旱 特旨飭撥帑銀濟米本年雨澤愆期較同治年間  
更久被旱地方更多請不待督撫查奏先行發給帑項交順天府及直隸山東河南各督撫設廠賑濟下  
戶部速議至是部臣奏復請令該督撫體視情形奏明辦理並擬由部庫撥銀十萬兩交順天府府尹直  
隸總督分領給賑 上諭直隸等省旱象已成近畿一帶關係尤重朝廷軫念民艱若俟該兼尹總督等  
查明奏報不免有需時日加恩著照該部所擬即由部庫撥銀十萬兩交萬善堂張汝卿李鴻章將順天

府及直隸所屬酌分成數派員赴部請領妥爲接濟至應否截留東漕後幫粟米之處仍著該督等查明具奏其山東河南地方並著該督撫飭藩司酌量倉庫存項被災輕重籌畫妥辦此外或應碾助倉穀或設廠煮賑或分赴鄰省採買或勸捐米穀接濟著萬青藜張澍卿李鴻章丁寶楨李慶昫督飭所屬詳細講求核實辦理務令實惠均沾毋任吏胥舞弊用副愍念災黎至意○癸亥諭崇實等奏查勘昭陵茶房等處應修各工請擇吉興修一摺著欽天監選擇吉期先行知照卽著盛京將軍會同工部侍郎屆期敬謹興修○乙丑托倫布病請解任允之以保英爲科布多參贊大臣桂祥爲幫辦大臣○丙寅御史吳鴻恩奏當今急務最重餉需日用所關實因民使自川鹽暢旺而釐課遂爲大宗自准運通行而舊岸必期漸復以引地論雖川准有界限以釐課論實帑項所統宗查兩淮額引一百八十二萬每年課釐不過三百餘萬川鹽經戶部議准分界行銷湖北則宜昌襄陽鄖陽安陸荊門五府一州湖南則澧州一屬引地十五六萬每年釐課二百餘萬部臣不難按冊而稽昨御史周聲樹奏回准岸禁止川私是但據淮南一而之詞於國家已成之鉅款未之深計也何以言之准鹽釐輕而弊重其利在商川鹽釐重而弊輕其利在國蓋准鹽成本既輕而獲利最重故淮南自計爭之川鹽成本既重而每斤釐課本省抽十餘文宜昌又抽十餘文是川鹽一斤釐課約三十文故湖北京協各銅荆州滿營兵餉水師及本省軍餉四川歲



解京餉重以甘陝協餉二百餘萬均指川鹽溢課坐撥是川鹽行楚關係匪輕卽如該御史所奏楚省全岸七十七萬之引額全銷亦不過一百六七十萬較之川鹽行十五大萬之引而溢課已二百餘萬數目相去懸殊且川鹽行楚不可遽禁者有六端同治八年前督臣李鴻章言之詳矣倘部臣尙未洞悉其弊而徒以復淮綱爲名適中奸商之計無論楚民喜食川鹽一時不能復也卽使全復亦不過如御史所奏稱十五大萬之引地在淮南加出課盤三十萬而所少川鹽卽在一百七十八萬徒爭引地之虛名而使已成之巨款歸於無著殊爲失算相應請 旨飭部妥議並飭兩江湖廣四川各督撫不分畛域公忠體國從長計議因時制宜以裕國用而順民心免貽後悔下戶部議奏○丁卯 上詣 大高殿 宣仁廟祈雨○祀 社 稷壇遣奕訢恭代行禮○諭崇實等奏敬典閣保護妥協請飭欽天監擇吉奉移列聖聖容暫行密藏一摺著欽天監於閏五月二十日以後六月初十日以前選擇吉期由驛知照崇實等屆期卽著恭請 列聖聖容敬謹籌藏○戊辰李鴻章奏 等正以地方久旱窮民餬口維艱本省力難籌濟爲感仰蒙 特頒銀米 加惠災黎遠近喧傳同聲感泣伏查同治年間災案奉撥賑款順直已有應分成數此次奉撥銀十萬兩本可仿照辦理惟順屬附近京師尤屬 宸慮自宜先其所急酌量勻分 臣已咨商府尹 核計應分幾成迅速咨覆以便各自派員赴部請領擇其地方尤爲瘠苦者先予

接濟至直屬倉儲久已空虛旱區甚廣粒食艱貴亟應欽遵 恩旨截留漕糧稍資補助 已飛飭山東糧道查報後幫粟米數目若干現已行抵何處相應懇 天恩准將山東後幫粟米儘數截留 敕下倉場侍郎遵照其有已經抵通者卽由順屬就近赴領約計東漕後幫爲數甚少不敷分撥查奉天本屆牛莊運通粟米二千九百餘石錦寧廣義四州縣運通粟米一萬一千七百餘石計將次第來津並懇 恩准一併截留備賑以廣 皇仁其順直應分米數容併酌商辦理一面督飭司道體察緩急情形妥核撥用務期實惠徧及不准胥吏舞弊 上諭本年近畿一帶天時亢旱業經撥帑賑濟並諭令李鴻章等應否截留東漕查明具奏茲據李鴻章奏稱遵旨查明懇准截留漕糧等語加恩著照所請所有山東後幫粟米儘數截留並將奉天本屆牛莊運通粟米二千九百餘石錦寧廣義四州縣運通粟米一萬一千七百餘石一併截留以備賑濟之用其順直隸應如何分撥米數之處該督等酌度辦理務督飭屬員體察緩急情形核實散放總期實惠均霑毋令一夫失所用副軫念民艱至意○李鴻章奏直隸地本瘠薄民多困窮疊被災傷元氣虛耗今又亢旱過久若旬月再無透雨則閭閻一百四十餘州縣勢將無處不災人心惶惶必須廣籌撫恤因思頻年欠賦皆因節次災歉所積而成嗣後卽遇中稔僅能勉完新賦徒存帶徵之名俾胥吏藉詞追呼重累閭閻實無裨於庫款此時天澤不降上下之氣未通 聖主宵

肝焦勞勩求民瘼畿疆重地根本所關臣愚擬請 特沛曠大之恩將直隸省同治十三年以前民欠及緩徵帶徵地糧旗租屯課各案補徵銀兩及出借倉穀籽種口糧牛具學租等項除十年以前已經豁免外其十一十二十三等年幾次欠緩者即予全行豁免以期緩輯人心感召 天和如蒙 俞允 當恭錄 恩行敬謹將黃迅速編行曉諭一面督飭司道核實確查欠數另行奏報儲有奉 旨之日以後未頒賸黃以前輸納者即作抵本年正賦務使窮民實惠普沾不准官吏絲毫捏混 上諭直隸地方近年災歉頻仍本年又復旱闕困苦若將積欠錢糧概行徵收民力實有未逮所有直隸省同治十三年以前民欠及緩徵帶徵地糧旗租屯課各案補徵銀兩及出借倉穀籽種口糧牛具學租等項除十年以前業經豁免外其十一十二十三等年迭次欠緩各項加恩著全行豁免以恤民艱該督即刊刻賸黃編行曉諭務使實惠均霑毋任吏胥舞弊用副軫念災黎至意其未頒賸黃以前輸納者著抵本年正賦不准稍涉牽混○已諭丁寶楨奏近來參革各員被參後並不回籍仍復懸踞省城造言生事請飭勒令回籍等語被參人員於參革後逗遛滯官省分毫無拘束任意妄為大為風氣之害此等惡習恐不獨山東一省為然著各省督撫嚴行查察凡有參革人員奉旨後即行勒令回籍如敢藉故逗遛原省滋生事端即著該督撫嚴行懲辦毋稍徇隱○諭軍機大臣等著丁寶楨於各兵勇內挑選勁旅派委久經戰

陳之員統領無事則訓練有事即聽候調遣尤須慎密措置不可稍涉張皇○庚午文煜丁日官奏福州省城東南濱海西路之上游延建汀邵四郡勢若建瓴溪流下注匯至侯官縣轄之洪山橋經閩縣轄之南臺大橋出五虎口而入於海本年各屬雨水過多自入春以來並未連日晴霽凡溪河蓄水之區本已盈滿省城自五月十六日後復大雨傾盆晝夜不息至十九日雨始稍停上游溪流奔騰下注又值海潮頂湧水勢驟漲城外西南東三路深至七八尺及丈餘不等城內西南東三門水深六七尺至八九尺即最高之北門亦有積水一二尺水深之處瀰漫無涯所有廟宇營房塘汎閩縣侯官二縣衙署監獄城鄉民居田園道路橋梁均被淹浸被難居民或拔樹登牆或爬屋上號呼之聲不絕於耳等當即督率司道及地方文武各官親自登城分別布置其時水勢突如其來城內外無從覓尋船隻當山總兵張陞情參將臧鎮藩親自解衣泅水前往城外以重價雇覓小船分投拯救百姓山四炮臺多設木梯引令登城分住城樓廟宇亦有就近拆至倉前山等處廟宇暫住其城內水勢以西南一帶為最重無如西門被倒塌房屋瓦石壅塞船不能入又經藩司葆亨督同武弁將瓦石疏通然後小船方能源源入城拯救將難民妥為安頓一面購備麩餅乾糧分給充饑一面將義倉存穀開碾煮粥先行賑濟並飭閩縣侯官縣將監犯移禁又恐游勇士棍乘機搶劫復派副將梁成華參將德安劉英傑等會同司道府縣將城內城

外分定地段彈壓照料徹夜梭巡至二十四日水稍漸消難民已有散歸內有無家可歸者暫住城樓棚宿伏查道光十四二十四等年省城兩次水災均經奏明勦款開倉賑濟平糶此次水災較上兩次尤重城內外低窪各處牆垣本係土築驟然被淹遂多坍塌間有傷斃人口臣日昌自二十日以迄於今夜復駐紮城上臣文煜每日親赴各城會同督率拯救撫恤各難民均頗安帖惟被災既重哀鴻滿目殊爲惻然應卽援照道光十四等年兩次成案查明被災水難民給發口糧倒坍房屋給銀修建其傷斃人口無力收埋者官爲給資至福州就地產米無多向賴外來米石接濟今猝遭水患商販不前米價驟昂貧民買食維艱臣等先已籌款商由督辦船政事務三品卿臣吳贊誠派撥輪船馳赴廈門採買米石一面酌議章程碾動倉穀設廠減價平糶並派員赴各路招徠商販源源運濟仍俟水涸後查勘被淹田禾有無傷損具上游建甯府延平府一帶暨福州府屬之古田等縣如何情形另行分別飭查詳細奏報又據閩清縣知縣王啟渠稟報該邑於本年五月十五十六十七十八等日連天大雨山水橫流加之上游溪水漲發湧入境內十九日自寅至戌一日之間驟漲三四丈以致城池廟宇衙署民房均被淹沒間有坍塌較之道光十四年之大水尙高一尺之多其民人或搬避船中或逃至山頂監押各犯先經督同典史押赴山上常平倉內暫行寄禁並無疏失現在水已陸續退去探詢城廂居民均無淹斃四鄉田稻亦無甚

大礙等情除批飭俟水退盡再行確查稟候核辦外等語附片陳明 上諭文煜丁日昌奏福建省城驟遭水患現辦賑恤情形一摺本年福建福州等府屬雨水過多五月中旬省城連日大雨又值海潮驟湧溪河漫溢城內外水深丈餘至一二尺不等田廬均被淹沒間有傷斃人口暨姦殊深矜憫卽著文煜等督率該地方官將被災難民妥爲撫恤毋任失所應如何勸放倉穀採辦米糧以資賑濟之處務當悉心籌畫妥議章程慎選賢能之員認真經理用副朝廷軫念災黎至意至被淹田禾有無傷損並上游建甯延平府屬及福州之古田等處被災情形並著查明具奏另片奏閩清縣被水淹浸居民尙無傷斃等語著該督督等一體確查妥籌賑撫○辛未諭廣壽奏天時亢旱時事艱難請飭中外臣工實力修省一摺方今時勢多艱新疆軍務未平國用未豐民生未遂本年京師及直隸山東等省天時亢旱閭閻困苦深宮宵旰焦勞倍深兢惕爾中外大小臣工務當振刷精神盡心職守毋得稍事因循內而部院堂官於該衙門應辦事宜認真講求屬員之賢否勤惰詳加考察而督撫大吏於地方利弊民生休戚悉心查訪尤須正己率屬舉劾嚴明庶幾共濟時艱日臻上理用副朝廷諄諄誥誥至意○諭軍機大臣等金順奏追勘北路竄匪情形並請飭烏科等城派兵扼款要隘英廉奏回匪竄撥塔境派隊防勦暨俄人解運軍糧被匪搶擄各摺片覽奏均悉賊匪由布倫托海竄出紅柳峽地方經官軍跟蹤追勘賊由吐魯番仍回

烏魯木齊金順現派兵駐紮木壘河三箇泉等處梭巡防勦但北路沙磧遼闊無險可扼防不勝防且東路爲大軍後路糧運所必經該逆雖已歸巢難保不乘間窺伺金順仍當嚴飭派出各軍認真防探遇賊卽擊毋稍疏懈布倫托海進西幾崑山地方竟有賊匪拾刦俄人糧石之事該處地勢以烏魯木湖烏梁海沙扎蓋爲扼要之區金順擬將塔爾巴哈台索倫等隊扼紮烏魯木湖科布多蒙古等隊扼紮布倫托海或烏梁海適中之地烏里雅蘇台黑龍江等隊扼紮沙扎蓋藉堵賊匪紛竄著榮全額勒和布車林多爾濟杜凌爾托倫布保英英廉酌度情形倘能分撥官兵前往扼紮未始非先事預防之計惟各城兵勇無多防勦均屬喫緊恐一時不敷分撥兼顧爲難前月左宗棠奏遣馬步出關當因烏科等城兵力甚單恐逆匪被勦旁竄諭令該大臣等改派勁旅於北路地方擇要扼紮現在烏魯木湖等處旣爲賊匪必竄之路卽著左宗棠金順妥爲籌商若各城無可分撥之兵該大臣仍當懷遵前旨卽派勁兵前往駐紮以杜分竄○甲戌子故仁和縣知縣李福謙於杭州建祠以猶子候補知縣李元熙附祀○乙亥哈密辦事大臣文麟卒賞銀一千兩治喪○孝陵大碑樓災命魁齡清桂收謹查勘承修○以明春爲哈密辦事大臣德克吉訥爲幫辦大臣○丙子覺羅文齡以裁賊懸盜發黑龍江○丁丑丁寶楨奏東省亢旱招商購米請免關卡釐稅下該部知之○兩○戊寅以得雨深逸 諭二十三日恭行報謝禮○加封卅鄂

縣應遷井龍神爲靈應昭佑聖拜○己卯丁寶楨奏東省約有泗河一道發源於陪尼山經曲阜滋陽鄒縣通入濟寧州境至瓜團分爲二股東股爲新泗河歷鄒縣而南至濟寧州再折而西西股爲舊泗河由瓜團分溜西行再折而南均山沙洲寺之泗河口入運漕合汶水南流入海又沙洲寺南七八里有接新泗河分溜一道名曰新河會白馬河水直入獨山湖湖自咸豐元年工決口黃河橫流二十餘年來泗河口運南邇北約五十里運河隄岸至今全行沖毀張家橋至泗河口舊泗河約二十里河身淤如平陸其間有河形者不過十之二三每逢夏秋泗水盛漲漫溢涉趨並頂托奔騰之汾水倒漾分流一由石佛崗缺口入濟寧州東鄉之黑土店登豐里等處一由新店入坡全注於濟寧南鄉各地方以致該州境內三百數十村莊悉爲澤國議議緩者二十餘載小民陷溺已久困苦堪憐同治七年該州居民於張家橋地方舊泗河口攔築土壩一道以禦水患而上游鄒縣等處來源暢洩無從鄒縣所設新泗河係屬泗水分支東南岸橫河及西岸李家河口等處地當坐漕頂沖迎溜頻年潰決亟應次第趕辦以上各工從前迭據該紳民懇請挑修均因經費難籌未曾舉辦本年江北漕糧仍由河運所有石佛崗至棗林間一帶殘缺運河堤岸已由河東會國麥斯估飭辦其張家橋等處新舊泗河工程亦爲運道所關且目前天氣亢旱水乏來源運河節節涸竭而二麥失收各處飢民嗷嗷困苦不堪言狀民生國計所繫甚重不



得不於萬難措辦之中設法籌辦以濟運道而顧災黎現已將張家橋至泗河口二十餘里淤墊泗河又新河及白馬河入湖各十餘里淤塞河道一律挑挖深通再將民間所築橫斷啟除使各暢行下注俾運道通順無慮凌阻而飢民獲此工作目前既可期安靖即日後亦幸免淹沒據委員勘估應需工料實銀二萬五千九百三十兩四錢三分三釐遂加確核無浮當經飭司竭力籌撥分派委員前往督飭紳董承辦監工並飭濟甯州督同經理河身挑出之土即以培築兩岸堤掄俾實捍衛現已據該委員等稟報興工臣仍嚴飭認真挑築總期工歸實在款不虛糜以仰副 聖主軫念漕運賑濟黎元之至意下部知之

○丁寶楨奏曹州府屬之濮州一城自黃水東趨後即被淹沒歷十餘年所有州城文武均係借寄民圩暫作辦公之地迨同治十年黃溜漸向南移城基復行湮出臣當飭前濮州知州吳恩榮重新建築俾復舊規以帑項支絀經費難籌 臣督飭南運委員等竭力自行籌辦未嘗分毫挪動庫款歷時幾及年餘始將城身及外濠一律修竣頗為堅實惟查該州城緊臨大河北岸逼近黃流上年堵築官莊新工於南岸建築長隄該州城池實形喫重若屆伏秋汛漲急流迅瀉駭浪澎湃城身被水搜淘時虞墊陷岌岌可危上年經該州紳民拚死搶護得保無事今年為日正長民窮力竭更難措置且本年春旱該州一黍無收又係水套案為賊匪出沒之所深恐飢民枵腹不堪流而為匪經該州知州恩稟稟請修築護城隄一道

一可保衛城身使失所災民有所棲止一可以工代賑暫可安撫民心等情以該州全境多在水中小民每年專指春麥一季收成以資糊口今值亢旱異常既無收而秋禾又無可指望實切隱憂不得不力從其請當經督飭該州相度地勢興築護隄一道為暫時補救之計計週圍共長一千三百三十二丈底寬五尺頂寬三尺高八丈在於司庫籌發銀一萬兩解交該州核實辦理目前飢民得此工作均各擔負負苦力營生尙為安靖即將來大汛盛漲州城足資抵禦災黎亦可免漂沒凡屬士民莫不頌

皇仁報因○壬午允鮑源深請撥借汾西孝義忻州河曲等四州縣倉穀並緩右玉等十一屬州縣應買年節平糶及應還借碾兵米穀石○癸未 上詣 大高殿 凝和廟報謝遺奏訴詣 社 稷壇恭代

行禮○崇實奏奴才上年奉 命出關沿途採訪輿論即知奉省按銷日捐頗滋物議抵任後於籌餉摺內聲敘將來地方銷捐名目總須量予豁除始足以培根本邇來詳加酌度並接見滿漢各僚屬傳探周諮均以此項日捐亟應及時請免以順輿情查咸豐六年前任將軍因籌經費創議試辦日釐二捐以資接濟其釐捐不過按貨抽釐分取於各買主責成鋪戶扣收呈繳所以民尙樂從至日捐則按銷逐日捐錢不論出貨之多寡但論鋪面之大小計大鋪每日捐東錢數十文至二三十文不等歷年既久雖貧富已有不同而輸將仍無虛日民間苦累曠有煩言當開辦之始通省合計每年可收東錢四十餘萬千近

則減至二十四五萬千矣緣大鋪歇業者無不立改小鋪以期避重就輕且賑捐之款向由各鋪戶經手往往以多報少巧於彌縫官若認真稽查動藉日捐以爲挾制甚至恃此居奇地方官竟有礙難辦理之處日下統計賑捐每年可收東錢一百萬千有零雖不敢謂裁撤日捐之後賑捐必能起色但不撤日捐將不能整頓賑捐是因有日捐之名轉難收賑捐之實顧此失彼亦屬非宜況本省籌餉總以賑捐爲大宗從無按鋪日捐之舉原以政體攸關須存限制奴才愚昧之見無論日捐有無妨礙賑捐而商民缺望流弊滋生若不決然豁除何以維國體而洽民情當與奴才岐元奴才慶裕再四籌商悉心體察惟有仰懇 天恩准將奉省日捐先爲裁撤庶民氣漸蘇實於地方不無裨益得 旨如所請行○是月秘魯國使臣愛勒謨回國由美使西華兼攝之